


LUSHIMUNO LWA

PAKALUNGA KAMEEMA

 Kasa tukyanye kukunyika mitwe yetu amba tulombe ne, Nakeba kutanga Kyambo kya Lesa. Amiwa kimye kyonse natemwa kutanga Kyambo Kyanji; mambo byambo byami bikankalwa, ke bya muntu, pakuuba Kyambo Kyanji kechi kikankalwa ne. Kabiji anweba mulondaizha kibaba, ne bikwabotu, twayai tutange kufuma mu Mateyo kyapitala kyabu 14, bufuku buno, kutatwila pa veeleshi wabu 22.

Ponkapo Yesu wakambizhe baana banji babwanga kutwela mu bwato, amba yai mutangilepo ku bushiya, aye kasa akimanya mabumba amba ayenga.

Kabiji byo apwishishe kwimanya mabuumba, wayile ku mutumba na kulomba buke: Kabiji... mabaanga abufuku byo afikile, wajinga konkakwa buke wwanji.

Pakuuba bwato ke bufike ne pakachi ka kalunga, ne manyaki ebakatezhe: mambo lubesha wapupilenga nakufuma kobabena kuya.

Kabiji mu kilo kya buna kya bufuku Yesu waishilenga ko baji, kasa enda pa meema.

Kabiji baana babwanga byo bamumwene kasa enda pa meema, baakaminwe bingi, amba, Kimonwamonwa; ke batame na moyo.

Kabiji ponkapotu Yesu wibambijile, amba, Ikalai na lusekelo; ye Amiwa bano; lekai kuba moyo.

² Twayai tukunyike mitwe yetu tulombe. Mu kimye mitwe yetu ne michima po byakunama kwi Lesa, mujipo kya kukabila mukishimikwa, bufuku buno, akyo kyo mwakonsha kutemwa amba kiyukanyikwe kwi Lesa, kupichila mu kusutulako maboko, ne kuvulukwa mu milombelo? Aye Nkambo atale pe anweba, etubile lusa.

³ Taata Wetu Wamwiulu, pano tubena kwiya mu Kyeenyi Kyenu, kupichila mu jishinda ne Jizhina ja Nkambo Yesu. Byo twayuka, na luketekelo lwapeshiwa, amba Aye witulaille, inge twakonsha “kwipuzha kiji kyonse” mu Jizhina Janji, amba Anweba mwikipane kwi atweba. Twasata bingi pa kikye. Byambo kechi byakonsha kulondolola bulongo byo twasekela pa kikye ne, na luketekelo lotuji nalo, amba Anweba mubena kuteleka kwi atweba pankopano.

⁴ Anweba mwamona ao maboko, Nkambo. Anweba mwayuka kyo bakabila. Anweba mwi wayuka bintu byonse, wabulume

bonse, Lesa wabula mpelo, kabiji twayuka mba Anweba mwayuka michima ya bantu. Anweba mwayukile milanguluko yetu. Nangwa kasa tukyangye kulengwa ne, Anweba mwayukile milanguluko yonse yo tukekala nayo, mambo Anweba mwi wabula mpelo.

⁵ Kabiji twalomba, Nkambo, pa kino kimye, nobe milanguluko yetu byo ibena kwiya kwi Anweba, talai panshi kufuma mu Meulu, Nkambo, kabiji sendai byakubila byetu ku muchima Wenu Anweba bene, Nkambo, kabiji tukumbulai monka mwaila bya bunoshi Bwenu biji mu Lukumo. Panai kwi atweba byakukabila bya michima yetu, twaketekela mba kyokyaswa muchima Wenu wa Bulesa. Kabiji twayuka mba ke kintu kimuwamina Anweba kuuba kyaswa muchima Wenu.

⁶ Tupai kwitulwilwa kukatampe kwa Kyeenyi Kyenu, bufuku buno, ne jikwabo Nkambo. Bukai bakolwa. Mpulushai balubilamo, imanyai boba bafwa mu bubi ne mu mizhilulwila, kabiji ne kwibaleta ku Bumi bupya, bufuku buno. Lekai tumone Yesu. Twikipuzha mu Jizhina Janji. Amena.

⁷ Anweba ikalaiko. Tulekelaiko mambo kechi twakonsha kutwezha bantu bavula ne, na mambo a kubula pa kwikala. Bino, kufuma ku bufuku butanshi, babena kwamba mba baweza mabumba akatampe a bantu, nanchi twalomba kulekelwa mambo pakyokyo. Kabiji Mulongo Grant kechi washimikile lumu mukwabo ne, nangwa byonkabyo, ku... Naketekela mba ku lubaji lwa kipiko ko basakubaisha kino kibamba. Aye wawama, wawama mulongo leelo wajikungipuzha kana Nakonsha kwalula kikye ke kintu kya pa mwaka pa mwaka, kubwela ku Dallas, ku kipwilo kyanji. Ke lwito lwabaya bingi, mu kino kimye, amo bizhilo mo bibena kushikwa bingi lubilo, kabiji nanchi mwanamulume ubena kukeba mba nabwela kuno ne kwikyalula ke kintu kya pa mwaka pa mwaka, kyubilo. Amiwa nasata pakyokyo.

⁸ Amiwa najinga nabo na kimye kya lumvwang'ano lwa bupopweshi lukeelo luno, na Mulongo Gordon Lindsay kabiji ne bakwabotu bavula. Mulongo Pearry Green, ye ubena kutundaika mbung'eno ibena kwiya ku Beaumont, waikala kunyuma yami bufuku buno. Kabiji bavula, balunda netu, Mulongo Don ne bakazhi banji. Tuji bingi na lusekelo pa kutanwa nabo muno. Aye Nkambo ebapeshe.

⁹ Pano, bufuku buno, nobe... Amiwa mbena kweseka kuleta Mbila yapeela nobe byo yafwainwa kwila, kyakuuba mba ne mwanayike wakonsha kwibikwatakanya.

¹⁰ Keesha mute ke pwijilo ya busapwishi, kabiji Nakeba mba anweba bonse inge mwakonsha kwiya.

¹¹ Pano inge muji na mpwijilo pa kipwilo kyenu, kika, anweba—anweba ikalai pa—paji kifulo kyenu. Atweba kechi tukebapo nangwa umo wafuma mu kipwilo kyanji ne,

ku...Kabiji pano inge wakolwa ubena kukeba kwiya na kulombelelwa, kabiji kipwilo kyobe bakekala na kupwila keesha mute, ambai ku kafunga wenu pa kikye, pakuuba mba kechi wakonsha kulanguluka byatama ne, mwayukatu. Mulekai ayuke mba tuji kuno mulumvwang'ano, mu—mu kukwasha Mubiji yense wa Yesu Kilishitu awo uji pa bukung'enda muno mu Dallas ne kuzhokoloka.

¹² Nanchi, keesha mute, Nalanguluka mba, pa tuu-sate, Amiwa nkambangamba Mbila ya busapwishi. Kabiji pano tukalombelela bantu bonse bakolwa, ne kutola bitupa byonse bya milobelo kabiji ne bintu byonse byashalapo mulungu yense, ne kwi balombelela bonse.

¹³ Bino mutwe wami bufuku buno ujitu pamo nobe kisela, pa mamineti achechetu. Kabiji Amiwa sakweseka kutwezhamo bavula bufuku buno monka mo Nakonsha kubila, pa kulombelela bakolwa. Kibaaba kyami ke, “kechi mube moyo ne, yami Iye,” Yesu ubena kwamba. Mutwe wami ke: *Lushimuno Lwa Pakalunga Kameema*.

¹⁴ Kyafwaijilwe kwikala pepi nobe mabaanga, juba jailenga na kuzhika akye po kyamwekele, kabiji jafwaijilwe kwikala juba nobe jakaba byonka byokiji kuno.

¹⁵ Kileta mwela watalala kyafwa, babena kwingijilapo. Ao oene mambo o Napipwile lufunjisho lwami kufuma kulwajinga kokwa, kyo Nakufwainwa kusampwilapo, nanchi Nakonsha kupelawizhako nakyo, pakuuba mba kechi mwafwainwa kwila mukyuya bibye ne.

¹⁶ Awe kibinda wamasabi mukatampe, panyuma yakumona kyo apichilemo mu joja juba, wa mumwenenga Yesu mu mwingilo Wanji mukatampe.

¹⁷ Amiwa nafwaijilwe kutemwa kwikalako mujoja juba, kasa namulondela Aye. Bino, mwayukatu, Amiwa kiji Najishuko ja jakuuba kintu kimo, kasa mbena kumumona Aye na kuuba bintu. Kabiji ke kikatampe bingi kumumona Aye leelo kukila byo kyajinga kyokya kimye. Amiwa njina lwitabilo lwabaya mwi Aye pakino kimye, kabiji nakonsha kwikala na lwitabilo lwabaya pakino kimye kukila byo Nafwaijilwe kwikala nalo pa kyokya kimye, mambo twaikala na myaka tuu sauzande ya kushinikisha mba Mamboawama akishiika. Kabiji pakupita myaka masauzande abiji, Aye ukijitu mumi, kasa abena kuuba byonka byo Aubile kyokya kimye, nanchi tuji na luketekelo lukatampe kabiji ne kintendekesho kya lwitabilo kyabaya pakino kimye kukila byo bajinga pa kyokya kimye.

¹⁸ Mambo, Aye wajingatu Muntu wazhokolokelenga na kwaamba mba—mba Aye watumwa kufuma kwi Lesa kabiji amba Mwaana wakwa Lesa, kabiji amba Lesa washinikishenga Kyambo Kyanji kyalailwe kya joja juba, mwi Aye, kabiji bajinga na ene mambo akwikizhinauka. Bafunda masukuulu

a mamboawama, byo bajinga! Kabiji monai kyajinga kintu kya lusa, kyajinga kyalusa bingi, mambo abo bafunda masukuulu a mamboawama bafwaijilwe kuketekela Kyokya inge Lesa kechi wibampofwele meso abo ne. Aye Baibolo byobyoyo aamba.

¹⁹ Bushe mwayuka mba Aye walaile mba Aye ukebampofula meso abo jibiji buleelo, amba kechi bakekimona ne? Abo bakekala ke “balupata lwa kuuba bibi, ba kwilundumika, ba kutemwa bya lusangajiko ne kutemwa Lesa ne, ba kubula kupwanang’ana, ba kubepela bakwabo, ba kubula kwilama, ba kubula kutemwa booba bya wama; kasa baji na kipashang’anotu kya munema wa bulesa, bino bakana Bulume bwao.” Ke mulaye omotu jibiji. Kabiji kafwako kyakuba ne kana kwibomvwinatu lusa bantu, kabiji meso abo ampofulwa kufika ne jino juba. Na Binembelo abyoye Lesa byo alaile amba bikafikizhiwa mu jino juba, mu kino kimye, kabiji tubena kutala ne kwikimona. Kabiji bantu bamona, bapukunya mitwe yabo ne kubwela bafumako, ne kwamba mba, “Amiwa kechi ne kimona ne.” Ke kintu kya lusa, bino Binembelo byafwainwa kufikizhiwa. Kyafwainwa kwikala muyewa musngo.

²⁰ Nanchi abo banababwanga bajinga basalululwa kwi Lesa. Bushe mwamona, Yesu wibambijile mba, “Kintendekesho kya inontanda kasa kikyanyge kwaalwa,” Aye wibasajile, kabiji bajinga lukunwa wa Lesa watongwelwa jimo. Oene mambo, makatazho umvwe afika, kabiji bantu bamwekelenga nobe baji ne Yesu mu koono, pa jipuzho, kechi pajingapo jipuzho pe abo ne. Abo kechi bekikwatakenye ne, bino abo kechi bakebelenga kuyukapo kintu kikwabo ne kanatu Aye. “Anweba yenka yenu muji na Byambo bya Bumi.” Kabiji bajinga na lupata lwa kwikala Nakyo, mambo batongwejlwe kwikala muyewa ofweshi.

²¹ Kabiji nanchi byokiji ne leelo, amba banabalume ne banabakazhi, batongwelwa Bumi bwa Peenape, bakeya ku Bumi bwa Peenape. “Bonse bobapa kwiba Taata bakeya kwi Amiwa.” Akyo kyo Kyambo Kyanji, kabiji kechi kikakalwa ne. Ke—ke Kyambo kya Lesa.

²² Kabiji twamona babo baana babwanga pakikye kimye, bajinga na mbung’eno ikatampe mujoja juba, mu mwingilo mukatampe ku lubaji lwa mutumba. Kabiji Yesu wibabujile mba, “Pano tangilaipo kubushiya bwa kalunga, kulutwe Yami.” Kabiji Aye wailenga kokwa ku mutumba, buke bwanji, na kulomba. Kabiji abo banababwanga, panyuma ya kukumanya balunda, Nalanguluka byo be kyumvwine.

²³ Mambo, kukumanya balunda, kabiji ne kwabana nabo; ponka pa kimye kyukuuba mba mwiwuka, kabiji ke mwambe mba-shalaipo. Akyo kimye kyonse kikala kinkozha muchima, mwaya kyaalo, kuzhokoloka ntanda, kukumanya balunda kabiji ne kwibasha, pa kuyuka mba bavula kechi mukamonang’ana

nabo jibiji ne poso kwibakumanya pa Kije. Ke kintu kileta bulanda.

²⁴ Nakonsha kulanguluka bwato, na—na tonga yabo yashijikilwa ku kitulu. Kabiji wafwajilwe kwikala Shimona Petelo, wajinga na maboko abaya ne bipuzhi, awo washijikile bwato ne kwibutazha mu kalunga kameema. Kabiji bonse basokwenenga mba-shalaipo ku booba bajinga ku kitulu. Kabiji babijikilenga mba, “Mukabwele jibiji muketuletele Nkambo a ketumonepo! Kabiji mukeye tukekale na kusangululwa kukwabo; twapeshiwa bingi leelo!” Kabiji balunda bapya ke basokone maboko. Kabiji wakajijile kukila banababwanga bashala, kabiji kape waikajile ku lubaji lwa mulongo wanji, Andeleo, ne kutola bilapo.

²⁵ Aa—aa mato be endeshanga na mwela nangwa na bilapo byo bavuwanga. Kabiji kapepo baikelenga babiji mu bwato, babiji ku lubaji lumo, kabiji bakonsha... nangwa babiji pa kipona kimo, byokabyo, kapepo sikisi nangwa eiti bilapo. Bakonsha kwendesha bukiji, kabiji muyewa musango bakonsha kukwachijila bwato inge kipupu kyaiya. Pano, inge mwela ubena kwendatu bulongo, bakonsha kusutula bisapi, ne kwendelamo.

²⁶ Kyafwajilwe kwikala kimye kya mute kwakaba, nobe mwaila Kinembelo akye kasa kikyangye kubiwa ne, kabiji nanchi kyafwajilwe kwikala kwazhindama, juba jasamine, mabanga akaba. Juba jailenga na kuzhika. Kabiji abo, byo bavuwilenga, kabiji baalulukile kebaye kabiji ne kushajikapobantu, “Twaketekela kwimumona jibiji kimye kikwabo,” byo batwelelenga mukachi ka kalunga. Kabiji juba jazhikilenga, ne mitetenga ya mabaanga abufuku, kabiji pa kimye kicheche—mfishi yaishile.

²⁷ Kabiji bafwajilwe kunyema bingi lubilo na—na kuvuwa, kabiji ke mwingilo wakosa bingi wa kuvuwa inge bwafika mu kalunga. Kabiji pepi nobe bonse bajinga—bajinga bafuji bamasabi, kabiji bantu bakosa bingi, bapijilwa na kalunga. Kabiji nanchi byo baketekejilenga Yesu kutwela mu bwato ne kwibalondela, bukiji bukiji. Kika, byo bafikile kokwa, bafumine kukitulu pachechetu; ne bwato bwabo bwatwile kuya, kabiji balekelelako.

²⁸ Kapepo Yoano mwanjike wafwajilwe kwikala mutanshi kwamba, mambo ye wakepejilepo pa jibumba. Kabiji ye wafwajilwe kwamba mba, “Amiwa natatula kumvwa kukooka pacheche. Twayai twibuleke bwende bwine pacheche. Pembelelaiko mineti umo, kechi twafwainwa kwendesha lubilo ne. Aye kechi wakiya ne, nanchi ne atweba twafwainwa kupembelelako pacheche tupemeko mwela wawama.”

²⁹ Kabiji byo aikele byobya na mutwe wanji wakunama pacheche, aye watatwile mbung’eno ya lushimuno. Kabiji akyo kyo Mbena kukeba kwambapo. Kyafwainwa aye yewajinga

mutanshi kwimana, ne kwamba mba, “Balongo, nangwa bantu bambe mbaka, kabiji nangwa uji yense alengulule byepi, Amiwa pano kine naketekela, panyuma ya leelo, kechi tubena kulondela wabubela ne. Atweba kechi tubena kulondela kintu kikwabo ne ke Lesa, mambo kafwako muntu wakonsha kuuba byo Akuuba leelo ne kanatu Lesa. Anweba mwayukatu, byo Akutola aa mabbisiketi ne kwiatabaula, ne kujisha aba faivi sauzande, akya kyajinga kintu kyakukumya bingi kwi amiwa. Kechi pajipo jipuzho kufika ne jaleelo ne,” pano Amiwa mbeni kupitulukatu mulushimuno lwanji byonka byo lwajinga, “bino akya kyakupwisha byonse.”

³⁰ Waambile mba, “Nakonsha kuvuluka myaka yapita kunyuma. Naikelanga kwipi na ku Yodano. Kabiji Nakonsha kuvuluka, nobe nsongwalume mwanjike, bami bawama, bamaama baki Yudeya bantolanga, mukimye kya mabaanga, ne kungikazha pa majoma abo nkupisha, pa kibamba kya kutwelelipo, kimye maluba kyo atepuka mwaya lubaji lwa kitulu kya Yodano. Kabiji batalanga kuya ja kiselebwa, konka kwafumijile bantu kupita mu kiselebwa. Abo bambulanga mashimikila a mu Baibolo. Jimo jishimikila jikatampe Amiwa jo nakonsha kuvuluka, kwajinga mwanamukazhi mwina Shunema kabiji kimye nsongwalume muheche po afwile, ne—ne ngauzhi wasangwile nsogwalume muheche kufuma mu lufu. Ajo jajinga jishimikila jawama bingi.

³¹ “Bino jimo jishimikila jawama, bamaama jo bambulanga, baambanga mba, ‘Pano, Yoano, obewa wi nsongwalume muheche; bino Nakeba mba obewa ukavuluke, byo ubena kuya nakukoma, amba, Yehoba mukatampe waletele bantu betu kufuma mu Ijipita, kabiji twapichile mungyetu kwabuka mukola. Kabiji pa myaka yonse fote, baendelengatu mungye, kechi kwajinga mampuzha kwakufumya byakumvwala ne, nangwa kwakufumya kajo ne. Kabiji Lesa wanokeshenga shinkwa kufuma mwiulu, kila bufuku, ne kujisha bantu betu amwa mungye, mambo bajinga mu ndonda ya mwingilo, na kulondela Yehoba mukatampe. Kabiji pano, juba jimo, Yehoba ukalengwa ke muntu pantanda, mu musango wa Muntu, Aye ukatelwa mba Umo mushingwa, ye Mesiyasa.’

³² “Kabiji Navuluka,” abo baambanga mba, “nobe nsongwalume muheche, milanguluko yami ya bwanyike yafwanyikizhanga, na kweseka kufwanyikizha, ‘Pano Lesa wibajishanga byepi bonse be, bantu bafika ku tuu milyoni na afu, amwa mungyetu? Aye Wafumyanga kwepi awa shinkwa?’ Kabiji Naipuzhanga bamaama mba, ‘Maama, bushe Aye, Yehoba uji—uji na bitofu bikatampe amwa mwiulu, kabiji Aye watekanga shinkwa yense wa, ne kunyema bufuku na kubikila pa—panshi, bantu, kabiji meulu akatampe akwa Yehoba ayulamo bitofu nyi?’ Abo baambanga mba, ‘Ine, mwaana, obewa wachepa bingi kukwatakanya. Mwamona, Yehoba ye

Mulenga. Aye kechi ukeba ne bitofu ne. Aye wambatu, kabiji Kyambo Kyanji kimwekanyika inge Aye waamba. Aye ye Yehoba mukatampe, kabiji Aye wikyambiletu. Kabiji ba Malaika be byabanya panshi, bya bantu.’

³³ “Kabiji leelo, Amiwa byo Najikumumona waimana byobyaya, bushe mwajikumona aya ntajilo pa kilungi Kyanji nyi? Kechi mwajingapo luzhinauko mu milanguluko Yanji ne. Najikukajila kunyuma ya jibwe, ne kumona Aye byo Akutola shinkwa ne ku mutebaula, ne kumupana ku. . . Banji bamingilo, atweba, na kwabanya ku bantu. Kabiji Aye inge wabwela mba a mutebule jibiji, awa shinkwa waikala ke mutuntulu ne jikwabo. Kabiji Aye waji kwikyuba bimye aduleendi, posotu bonse baikuta, kabiji kwajinga misasa, yayula, yatolelwe. Amiwa nayuka mba awa kechi wajinga mukwabo ne kanatu Yehoba, mambo Aye wajikubanga byonka byaubilepo Yehoba. Yekatu Yehoba ye wakonsha kulenga. Kabiji Nayuka mba awa Muntu kechi wabubela ne. Kujitu Mulenga umo, awo ye Yehoba. Kabiji pano, pa bintu byonse byo Namonapo, akya kyakundengela kushininwa.

³⁴ “Amiwa nakeba anweba muyuke mba muchima wami yense wipana, kabiji Amiwa naketekela mba Aye kechi ngauzhitu ne. Aye ke ngauzhi, bino Wakila pa ngauzhi. Aye kechi kintu kikwabo ne kana Yehoba Lesa waikala mukachi ketu, mambo Aye walengele shinkwa, kabiji Aye wajinga na byubilo bya Yehoba. Oene mambo Aye kyo aambijile mba, ‘Inge Nabula kuuba mingilo ya Ba Taata, nanchi kungitabila Amiwa ne; pakuuba inge Nauba mingilo ya Ba Taata, ne anweba mwabula kungitabila Amiwa ne, itabilaiko mingilo, mambo ayo inshimuna Amiwa ne kubulang’ana Yami Ng’anyi.’ Kyamwekele nobe bantu bafwainwa kumona kyokya, kyapelatu.”

³⁵ Kabiji Yoano washinijilwe mba Aye ye Mesiyasa, yenka Umo Isaya ye atelele mba, “Kwi atweba Mwaana wasemwa, kabiji Jizhina Janji jikatelwa mba Upana maana, Mfumu wa Mutende, Lesa Wabulume, Shabatu wa Myaka.” Kabiji Yoano washinijilwe mambo wikimwene. Mulongo mwanyike wapainenga lushimuno lwanji.

³⁶ Pa kyokya kimye, Shimona Petelo waambile mba, “Kyawama, pano, mineti umotu. Inge tusakwikala na mbung’eno ya lushimuno, Amiwa njina kintu kyakwambapo. Mwayukatu, Najinga naluzhinauko lwa byonse bye, mulongo wami Andeleo, ao watanwanga ku kusangululwa kwa Yoano ngauzhi, ao waambilenga mba Mesiyasa ubena kwiya kabiji ukamulondolola Aye. Kabiji Najinga waluzhinauka na byambujilenga Andeleo, mambo Amiwa naumvwa misango yonse ya mashimikila aba Mesiyasa ne bintu bikwabo.

³⁷ “Bino anweba bonse balongo mwavuluka bataata bakote. Jizhina jabo bajinga ba Yona. Kabiji anweba mwibavuluka,

byo bajinga na lwitabilo lwakosa bingi. Amiwa byo Nakonsha kuvuluka bamaama ne bataata, ne atweba bonse, twaikelanga mu kukwata masabi, kabiji kukwatapo masabi ne; twakebelenga shinkwa, kabiji ne byo twakonsheshe kufukama ne kulomba kwi Lesa, 'Ntupai masabi leelo, Lesa, pakuuba mba tupoteshe masabi, ne kulipila makongole etu, ne kwikala na kajo ka kuja.' Kabiji twayanga pa kalunga, mu kipupu, kabiji kyashupa kumanya kipupu.

³⁸ "Kabiji bataata, Nakonsha kumona suki yabo yamvwi kasa yakukulukila kunyuma, juba jimo byo baikele poopa patonga ya bwato baambile kwi amiwa, mba, 'Shimona, obewa wi mwaana wami mubeji. Wayukatu, Amiwa kimye kyonse najinga waketekela, Shimona, amba Amiwa nkamona Mesiyasa. Bantu betu Bamupembelela kufumatu kimye kya mu Edena. Kabiji tuji na luketekelo amba Aye ubena kwiya, nangwatu kimye kibaye byepi. Apo papita myaka foolo sauzande, byo kyambiwa. Bino Naketekela mba Mesiyasa ukeya. Kabiji yense Muyudeya uketekela mba ukamona Mesiyasa mu kimye kyanji. Amiwa naketekela kumumona Aye mu kimye kyami. Bino kyamweka nobe, Amiwa pano ke nemukote, Nafwainwa kuleka kuya pa kalunga, mbeni kumvwa mubiji kutata ne kukola, Amiwa kapepo kechi kamumona Aye mu kimye kyami ne. Bino kape obewa ukamumona, mwanami.

³⁹ "Kabiji Amiwa nakeba kukufunjisha mu Binembelo. Mwanami, Mesiyasa kasa akyangye kwiya, kukekala bintu byavula bikobiwanga, misango yonse ya bintu byabubela, mambo Satana ukooba kyokyo, pa kuuba mba akonaune bongozhi bwa kwa Mesiyasa kimye kyo Akeya." Kimye kyonse kikala muyekao musango; kikijitu musango umo.

⁴⁰ Kabiji twatana kuuba mba, aye waambile mba, "Navuluka aye wankumbachiilemo, ne kwamba mba, 'Mwanami, kujitu jishinda jimo ja kuyukilamo Mesiyasa. Bino twaikala na myaka ma aduleendi kwakubula kwikalapo na ngauzhi ne. Malakai wajinga ngauzhi wetu wapelako. Apo papita myaka foolo aduleendi, kechi twaikalapo na ngauzhi ne. Bino vulukai, Mosesa witubuujile mba, mu Binembelo, amba, kimye Mesiyasa byo akeya, Ukekala ngauzhi, inge Aye wamweka. Atweba Bayudeya twafunjishiwa kuketekela ngauzhi. Kabiji lwendo lwa Mesiyasa pantanda ke Kyambo kya Lesa kyaambiwa, akyo Aye kyo etulaile. Kabiji Kyambo kimye kyonse kiya ku ngauzhi, kabiji ngauzhi ushinikisha kyokya Kyambo. Kechi wafwainwa kulubako kyokyo ne, mwaanami! Kwakonsha kwikala bintu bikatampe bikeya, kwakonsha kwikala lutundaiko lukatampe ne—ne bintutu bikatampe. Bino vulukai, Mesiyasa ukekala ngauzhi, mambo twayuka mba Lesa kechi ukingya jishinda Janji ne, kabiji Aye waambile mba Mesiyasa ukekala ngauzhi. Nanchi vuluka, mwaanami, bangauzhi ke booba banji na Kyambo kya Nkambo. Kabiji umvwe Mesiyasa waiya, Ukekala ngauzhi.'

41 “Amiwa nakonsha kutwajijila nakumvwa kuboko kwanji,” Shimona byo aambile, “byo ekubikilenga pe amiwa. Kabiji Andeleo waimena byobya kasa abena komvwa makonde, pa kyokya kimye. Obewa wikivuluka nyi, Andeleo?”

“Ee, Shimona, Na—Navuluka.”

42 “Kabiji Andeleo wambujilenga mba awe Yoano wajinga ngauzhi. Amiwa najinga na bintu bikwabo byakuuba, napoteshenga masabi ne bintu bikwabo. Nanchi bataata po bafwijile papita myaka, bino Amiwa kimye kyonse ne kilamatu mu milanguluko; bataata baambile mba, ‘Awe Mesiyasa ukekala ke ngaunzhi wayukanyikwa mu Kinembelo, kabiji kechi ulubeko ne, mambo ke Kyambo kyaambiwa kya Lesa. Kabiji akya Kyambo kimye kyonse kiiya ku bangauzhi; akyo kyamuyukishe, nangwa kyasolwele kyalailwe kya muyoya nkulo.’”

43 Kabiji pano Shimona, “Juba jimo,” amba, waambile mba, “mwayuka, Andeleo wangipwizhe mba tuye na kupwila. Kabiji Naileko ku mbung’eno kwajinga yuwe Mulongo, Yesu, nkoajinga. Kabiji Naumwine misango yonse ya byakumvwa umvwa. Kwajinga Yesu wamwekele, Aye kasa akyangye kwiya, ao walaile kwikala mukatampe, watangijile foolo aduleendi kabiji bonsetu baonaikile, ne bikwabotu. Nalangulukile mba ungitu mukwabo wa yewa musango, wajinga na lutundaiko lwa kusangululwa, nangwa dinominesheni umo mukatampe ye balengelenga. Bino juba jimo Nalangulukile mba Amiwa nsakuya ne Andeleo kuno, mulongo wami.”

44 Kabiji Nakonsha kulanguluka, pa kyokya kimye, bwato bwatatwile kusukana. Muntu umo watatwile kubijika, kabiji waambile mba, “Ikalai panshi! Kechi mwibwendeshe bwato ne. Pembelelaiko mineti umo. Zhindamaitu.”

45 Kabiji aye waambile mba, “Mwayukatu, byo Naile kokwa nakafikile kwi Aye, kimye kitanshi, Aye wantajile ku meso ami kabiji watongwele jizhina jami. Aye kechi wankimwenepo kala ne. Kechi Wangyukiletu ami yeka ne, bino Aye wayukile ne bataata bakote ba bulesa, bo bafunjishishenga mu Binembelo. Kabiji Nayukile mba Awa wajinga Mesiyasa. Akya kwapwishishe byonse, ponkapatu. Byo kyajinga. Akya kyajinga kyalumbuluka, kwi ami.”

46 Wafwaijilwe kwikala Filipa waambile mba, “Bushe Nakonsha kwambapo kyambo nyi?” Bino aye waambile mba, “Mulongo Natanela, kechi uleke kikye kikukozhe ne; mambo, mwayukatu twafunjile mivungilo ya mabuuku pa myaka yavula, Mesiyasa byo akekala. Bino byo Namumwene Aye wauba kyokya, Nafuminepo na kusenda mulunda nami kuno, Natanela. Kabiji byo aishile. . .”

Natanela waambile mba, “Lekai ne kyambe. Lekai ne kyambe.”

⁴⁷ Oo, mwayukatu, pajipo kintu kimo umvwe Yesu wakubilapo kintu kimo, obewa—obewa kechi wakonsha kwimanatu ne, wafwainwa kubulang'ana, obewa mwine. Abyo ibyo nyi? Inge kintu kyakine, wafwainwa kwikyamba. Byo Agyuzhizhe na Mupashi Wazhila, Nakeba kwikibulang'ana. Nakeba muntu umo ekiyuke. Kechi muntu mukwabo kwi kyamba ne; Nasaka kwikyamba, amiwa mwine.

⁴⁸ Kabiji Nalangulukatu mba, Natanela wasangalele ne kwamba mba, “Mwayukatu, Nasaka kwamba kikye. Amiwa najinga na luzhinauko ne obewa, Filipa, byo wambujile. Nakwipwizhe mba, ‘Bushe mwakonsha kufuma kintu kyawama mu Nazala nyi?’ Kabiji wampele mukumbu wawama muntu uji yense ye akonsha kupana, ‘Iya wi mwene.’” Akyo kingila bulongo leelo. Abyo ibyo. Kechi wikale ku nzubo na kujimbulula ne. Iya, obewa mwine wimwene, mwamona. “Waambile mba, ‘Bushe mujipo kintu kimo kyawama kyakufuma mu Nazala nyi?’ Waambile mba, ‘Iya wimwene obewa mwine.’ Kabiji wayuka byo wambujile.

⁴⁹ “Kabiji byo Nafikile mu Kyeenyi Kyanji, kabiji Aye wambujile mba Amiwa ne ‘mu—mu Hebelu, mwina Isalela, kabiji muntu wakinshika,’ Nayukile kyokyo.

⁵⁰ “Bino Nakuminye, ‘Pano kyakonsha kwikala byepi?’ Aye wamwekele nobe muntutu. Amiwa naketekejile mba Mesiyasa ukékila kufuma Mwiulu kupichila mu makonde agolonde, ne kuya kutangi wa dinominesheni, ku Yelusalema, waya na kwamba mba, ‘Kefasa, Amiwa nafika.’ Bino bataine kuuba mba, Aye wafumine mu Nazala, kufuma ku kisemi kyabuyaji; kabiji kine nobe wajinga na jizhina jafita kunyuma Yanji, nobe ‘mwaana wa mubukende.’ Apano Aye waimene, wamvwajile mu bimvwalotu, kechi nobe pulisiti nangwa muntu umo ne; nobe muntutu. Kabiji Nalangulukile, byo Naendeleo kuya kookwa, ‘Wakonsha kwikala byepi Mesiyasa? Wamvwajile kimwalo kimotu kyakala, kyo Amvwajilenga kufumatu ku bwanyike, kabiji ne pano kya kumvwalatu kimo; kabiji ne suki Yanji yakukulukile kunyuma Yanji. Kabiji wajingatu nobe muntutu wa mu mukwakwa.’

⁵¹ “Kabiji Aye wantajile mu kilungi, ne kwamba mba, ‘Filipai kasa akyangye kukwita, kimye kyo wajinga mushi ya kichi, Nakumwene.’ Apa pooka popapwijile byonsetu. Nayukile, kupichila mu Kyambo, awa wajinga Mesiyasa. Awa wajinga Iye.”

⁵² Kabiji bwato kwasukene, ne mbung'eno ya lushimuno yatwajijiletu. Oo, bajinga na kimye kyawama bingi, apa pa kalunga, bajinga na kimye kyawama bingi.

⁵³ Andeleo waambile mba, “Amiwa nasaka kwambapo kintu kimo kyakatezhe pa kimye kimo. Anweba vulukai kimye atweba kyo—kyo twailenga ku Yeliko? Aye waambile mba, ‘T wafwainwa kuya; Nafwainwa kupita kuya ku Samaliya.’ Nanchi, Aye waile

kufika ne ku Samaliya kabiji konka ku muzhi wa Saikala, byo Etuntumine na kupota bya kuja mu muzhi.”

54 “Oo, ee, Navuluka kyokyo, kyawama!” Bonsetu, “Ee, ee!” Bwato kwasukenenga, muntu yense wajinga na lushimuno lwawama pa kupwisha kusanguluka. Nanchi bajinga na iye mbung’eno ya lushimuno.

55 Kabiji aye waambile mba, “Ee, vulukai twafumineko, kabiji, kitukumishe, twamwene Nkambo yetu waambilenga na pite wayukanyikwa. ‘Uh-uu,’ twalangulukile mba, ‘akya kyatama. Mumonai Aye ubena kwisamba na yuwe mwanamukazhi mwanyike. Kabiji wajikwituntuma twafumako, kabiji Aye uji kuno na yuwe mwanamukazhi-mubi waikala papo.’ Vulukai, twaimene kunyuma ya bipupu, kasa tumvwa misambo yabo.

56 “Kabiji twamumvwine Aye wamwambila mba, ‘Mwanamukazhi, yanga ukalete mulume obe eye kuno.’

57 “Kabiji twaambile mba, ‘Kyawama, twajingatu na kilubo, kapepo mwanamukazhi wasongwelwetu bulongo.’

58 “Kabiji wamukazhi wamutajile Aye ku meso, ne kwamba mba, ‘Mwane, Amiwa kechi jipo na mulume ne.’

59 “Mwavuluka michima yetu byo yakakelwe? ‘Mesiyasa Wetu mukatampe ye twajinganaji na luketekelo, apo wakwatwa na bubela, ke mujilo, mambo Aye waambile mba, “yanga ukalete mulume obe,” kabiji wakumbwile mba kechi ujipo na mulume ne. Pano kyamubwelela Aye.’ Vulukai atweba bonse byo twamwekele kwikala bakumya, ne kupema konse kwalekele mwi atweba?”

“Ee, Amiwa ne kivuluka.”

60 “Kabiji pano mwavuluka byambo byalondejilepo? Aye waambile mba, ‘Obewa waamba bukine, mambo waikala na batanu, kabiji ne yuwe ye uji nanji kechi obe ne.’ Oo, mwavuluka mbung’eno ya lushimuno kunyuma ku kiswa nyi? Ami!” Mwamona, kechi wakonsha kumukonesha Aye ne. Aye ye Lesa. “Oo,” Shimona waambile mba, “akyo kijitu. . .” Andeleo waambile mba, “Akyo kyapwishishe byonse kwi amiwa.”

61 Batolomeo waambile mba, “Pembelaiko, Nasaka kubikamo lushimuno. Nakonsha Kwikyuba nyi, balongo?”

62 “Oo, kyawama, Naketekela mba wakonsha, tuji na kimye kyabaya bingi. Aye kechi wakiya ne, nanchi tusakuvuwatu pacheche. Twajijila, Batolomeo, na kushimuna.”

63 “Kyawama, kintu kimo kikatampe kwi amiwa, vulukai nyenga yetu ku Yeliko, watelwa mba Libeka?”

“Ee.”

“Kabiji mulume wanji uji na mwakujiila kokwa.”

“Uu-uu.”

64 “Kabiji—kabiji aye wajinga musulu, ne jizhina janji jajinga Zakyasa.”

“Ee, ee, Namuvulukatu bulongo.”

65 “Anweba vulukai, aye wajinga—aye wajinga umo wa banyenga yetu. Aye waketekejile mwi Nkambo, kabiji aye wajinga na moyo wakwamba mba Zakyasa kechi ukamwitabila Yesu ne. Kabiji, oo, Zakyasa wajinga mulunda wawama bingi kwi pulisiti. Kabiji nanchi aye walombelenga mba kintu kimo kimweke kyakuuba mba meso anji anshikuke, ayuke mba awe ye Nkambo, awe ye Kyambo kya Lesa kyashinikishiwa, kyalengwa ke muntu mukachi ketu. Kabiji twaesekelenga ku mubuula . . . ku mubuula mulume na mambo a Yesu mwina Nazala mba wayuka byafyamika mu muchima, na kumweshwa mba Aye wajinga Kyambo, mambo Kyambo kiyuka milanguluko iji mu muchima.

66 “‘Kafwamo maana,’ aye byo aambile mba, ‘Amiwa naketekela mwi pulisiti. Byamba pulisiti byafikilamo kuwaina kwi amiwa.’ Mambo aye wajinga wa kulubaji—lwandonda ya muzhi, bena Kiwani kabiji ne byonse, mwayukatu, nanchi aye . . . kyajinga kyakosa pakuuba mba afumemo mu kyokyo. Nanchi Labeka witwipwizhe atweba bonse mba tulombe—amba tulombe. Kabiji kimye kyonse kyo twaiyanga pa yuwe mutwe Aye wajinga ngauzhi, waambanga mba, ‘Kechi muji maana ne! Pulisiti waamba mba, ‘Awe Belezebabuba. Aye ke diabola. Aye uba kikye na bulume bwa diabola. Kabiji Aye ke muntu ukaila ku bongo bwa muntu. Akyo kyokyonka kijipo. Kafwako kikwabo kijipo ne.’ Nanchi kechi kujipo kintu kya yewa musango mujino juba ne; kechi twaikalapo na bangauzhi pa myaka ma aduleedi apitapo ne. Kabiji awa Mwanamulume, kechi ujipo na kitupa kya lumvwang’ano ne, Aye wakonsha kwikala byepi ngauzhi? Oo, ine Aye kechi wakonsha kwikala muyeo musango ne!’

67 “Bino, mwayukatu, Labeka watwajijiletu na kuketekela, mukazhi wanji, kabiji ne kulomba. Kabiji lukeelo lumo Yesu byo aishilenga mu muzhi, kyawama, pano twatana kuuba mba, Labeka witubujile mba Zakyasa waya mu—mukwakwa, amba Amumone. Nanchi aye kechi waketekejile mba Wajinga ngauzhi ne, nanchi waambile mba, ‘Amiwa nasakatu Kumumonapo,’ byo apaine lushimuno kwi atweba munzubo ya majila juba jimo byo twajilenga. Nanchi wakajijile ku kichi kya Saikala, ne kwamba mba, ‘Mwayuka kine kintu, Amiwa nsakwifya pakuuba mba Aye abule kumona. Amiwa ne mulongo mucheche, nangwa byonkabyo, naipipa bingi. Kabiji Amiwa kechi nakonsha kumumona kokwa ne, mu jibumba, nanchi Amiwa nsakukajilatu ku kikye kichi.’ Kabiji aye wakajijile pa—pa mapanda, kabiji ponkapa wabwela waikala, pakachi ka misapi.”

68 Aya ke mpuzha yawama pa kwikala ne kumona bulongo. Apa pajinga pamasanga, njobe ne ja kwa Lesa; milanguluko yobe. Akyo ke kintu kyawama, pa kwikilanguluka.

⁶⁹ “Nanchi aye waambile mba, ‘Mwayuka kine kintu nyi, Wafwainwa kwikala ngauzhi. Aye byo afwainwa kwikala. Kyakonsha kwikala byonkabyo Amiwa naya mungi. Nanchi Amiwa nsakwimubula, Amiwa nsakumutala bingi bulongo Aye; kabiji Aye kechi usakungyuka ne. Nanchi Amiwa nsakutola mabula onse ne kwimvweta bibye, kwizhokolosha, kabiji Amiwa nsakwifya pakuuba mba Aye kechi wakonsha kumona nangwa pachechetu ne. Kabiji Amiwa Nsakumumona inge Waiya. Kabiji inge Aye wamweka nobe kechi ye wantu waitabilwa ne, Amiwa Nsakumupa milanguluko yami, kasa naikala pakikyeye kichi.’ Nanchi wamutajilenga, kabiji wajinga na jibula jo asutwilenga pakuuba mba Amumone inge Wafika pepi.

⁷⁰ “Kabiji byo Aishile mukoona, kasa enda mwaya mukwakwa, mwayukatu, na kukeketa kufuma ku lubaji lumo ne lubaji lukwabo, kabiji banababwanga baambilenga mba, ‘Imana kumbaji. Amiwa ndekelaiko mambo.’ Kabiji bantu baji na baana bakolwa ne bintutu bikwabo. ‘Amiwa mundekeleko mambo, Nkambo wakooka bingi; nayoya mpwijilo ikatampe bufuku bwapita.’ Kabiji, mwanamulume walumbuluka, ‘Twasashijila mwakonsha kwimanako ku lubaji lumo kabiji mumuleke Apite, kimye Aye byo Ailenga mu muzhi, kabiji twasashijila mwakonsha kwimanako ku lubaji lumo nyi?’ Kabiji Zakyasa waikela kwiulu ku kichi, kasa abena kumutala Aye panshi.

⁷¹ “Kabiji Yesu waishile mushi ya kichi, waimene, watajile kwiulu ne kwamba mba, ‘Zakyasa, ikila kufuma ku kyokyo kichi. Amiwa mbena kuya nobe ku nzubo leelo, ku kajo ka mulajilo.’ Akyo kyapwishishe byonse kwi amiwa. Aye wayukile mba uji kokwa kwiulu, kabiji wamuyukile jizhina janji, byo ajinga. Akyo kyapwishishe byonse. Awe ye Mesiyasa, kwi amiwa. Ee, mwane. Mambo, twayuka mba Mesiyasa ukoba kikyeye. Kyakine. Nanchi Aye wayile nanji ku nzubo, amba, aja juba kokwakujila kajo kamulajilo. Kyajinga kimye kyawama bingi! Twikivuluka.”

⁷² Anweba mwayukatu, kyajinga pa kyonkakya kimye, mbung’eno ya lushimuno kasa ibena kutwajijila. Mwayukatu, abo banababwanga pa kalunga, bapainenga lushimuno, kyajinga kimye kya mu mfishi ya bufuku, akwa mu byaalo bya ku kabeta ka buyeke, apo Satana po aendele kuya peulu ya katumba ne kutala mushi. Aye watajile muyoya mbung’eno ya lushimuno, kabiji bataine mba baenda kwakubula Aye ne. Aja pano jajinga jishuko janji.

⁷³ Mwamona, Nalanguluka mba abya byamwekele byabwelapo ne jikwabo, byabwelapo jibiji. Bajinga, mulusekelo lwa kusangululwa, bayile kwakubula Aye ne. Kabiji Naketekela mba akye kyo kimweka ne kwi atweba leelo, amba, mu kino kimye kyakulubakanya, kabiji pakupwisha kukwe kusanguluka kwabaya kotwajinga nako na bukamonyi. Kyaya pantanda ponse. Kila kyaalo kyonse kyajinga na mujilo wa kusanguluka,

watemenenga; kupwila kwalubuko kwabaya; bantu kutambula Mupashi Wazhila, mu biumbi jikumi bya biumbi. Kabiji mulolwa lusekelo, nobe booba banababwanga bapainenga lushimuno lwa byo Aubile, “kabiji, oo, twamumwene Aye wauba *kikye*, kabiji twamumwene Aye wauba *kyokya*,” Naketekela kyo twayila nobe abo, kwakubula Aye ne.

⁷⁴ Twaya mu bintu bikatampe abyo—abyo byaleta kusangululwa. Twaya mu bintu bikatampe bya kulenga mali, bipwilo, kushimika bishimikwa bikatampe, bifulo bikatampe bya mamilyoni-a-madola, masukuulu akatampe, mitanchi ya kufunda, kabiji ne kubaisha dinominesheni wetu. Kabiji byotuji na lunengezho lwetu lwa komyunizimu, kukanya komyunizimu, byo byonka byo twambapo leelo. Kabiji kintu kitanshi mwayukatu, Satana witumona na mitanchi yetu ya kukanya komyunizimu, mitanchi yetu yabaya ya madinominesheni, kabiji ne bikwabo “mamilyoni avula,” ne bikwabotu, byo baji nabyo.

⁷⁵ Kabiji twaya kwakubula mbung’eno ya musango-wakala wa milombelo ne lubatizhilo lwa Mupashi Wazhila kubwela ne, poso mujilo keatemene panshi. Obewa wakonsha kujila, ne kweseka kutwala bantu ku kitapisho, kabiji ke bende nobe bafwa, na moyo ubena kwiya. Kabiji mwaipuzha ne bamwingilo kulomba nabo, “Oo, kika kyo angipwizha amiwa?” Kabiji inge bafika konka, kechi mwakonsha kwibamona ne. Kabiji bemanatu mamineti acheche, bakutala, kabiji babwela baikala mu bipona byabo. Kwi amiwa, mujilo wazhima! Kintu kimo kyamweka. Telekai! Kyo tubena kukeba ke kusangululwa, amba bandengamambo, batale kwi Kilishitu, balapila, banyemene ku kitapisho na maboko abo asutulwa peulu, kasa babena kujijila lusa, ne kipwilo kyonse kyaambukatu mujilo, na lukumo lwa Lesa.

⁷⁶ Lusekelo lwetu lwapana mashuko a kulengela madinominesheni etu abaye, twashimika masukuulu akatampe a kufunjisha bamwingilo, ne kwibatwala kwalepa kufuma kwi Lesa kukila byo bajinga pakutendeka. Lesa kechi uyukanyikwa na kufunda ne. Aye kechi uyukanyikwa na masukuulu a mamboawama ne. Lesa uyukanyikwa kupichila mu lwitabilo. Anweba kechi mwakonsha kulondolola Lesa ne. Aye wakila pa kulondolola.

⁷⁷ Talai byo kyaubiwa, atweba bantu baki Pentekosito bajinga bu pentekositi. Betu banabakazhi batenda suki yabo, bamvwala bya kwikobaika. Betu banabalume bebiswisha. Bamingilo betu bebiswisha. Baji na moyo wakwambapo kintu kimo pa kikye. Kipwilo ki kechapangamo inge bekyuba. Oo, inge twabula kuwamisha manzubo, kutatwila ku pulupiti kufika ne panshi. Ke kyabuvu. Ke kyamyendeleko.

⁷⁸ Umo mwanamulume wayishile kwi amiwa, ne kwamba mba, “Mulongo Branham, bantu bakutemwa.” Bino waambile

mba, “Obewa kimye kyonse ubena kwibawelegeka, kuwelegeka banabakazhi, na mambo a suki yaipipa ne bintu bya musango yewa.”

Naambile mba, “Aye Baibolo waamba mba ke kyabuvu aye pa kwikyuba.”

⁷⁹ Aye wapelula mulume wanji inge wikyuba. Kabiji ke kiyukilo kya kuuba mba obewa wafuma kwi Lesa. Vulukai, na lukatazho lwa kwa Samisoni, suki yalepa yajinga kiyukilo kya bunazili amba wafuma ku ntanda, ne kuya ku Kyambo kya Lesa. Kabiji umvwe mwatenda suki yenu, banabakazhi, mwakana kuuba mba kechi mwikiyukilo kya Bunazili ne. Anweba mwaya ku Hollywood mu kifulo kya kubwela ku Baibolo. Aye Baibolo waamba mba, “Balekai bekale babula kutenda.” Monai, ke kyabuvu, kabiji ba bamingilo kechi baambapo kintu nangwa kimo pa kikyene.

⁸⁰ Awe mwanamulume waambile kwi amiwa mba, “Kika kyo ubujila kwibalekatu banabakazhi?” Waambile mba, “Bakumona mba wi ngauzhi.”

Naambile mba, “Amiwa kechi naambapo mba Amiwa ne ngauzhi ne.”

⁸¹ Waambile mba, “Abo bakumona mba byo uji. Bafunjishai byakutambula bya bupe byamupashi ne kuba kintu kimo. Mwafwainwa kwibafunjisha bintu byabaya, bintu bikatampe.”

⁸² Naambile mba, “Amiwa Nakonsha kwibafunjisha byepi samushi kasa babula kuyuka ne ABC’s, mwakwikela nakyo mwafwainwa? Musa kwikyuba byepi? Ee, yanga ku kintu kitanshi.”

⁸³ Pamwaka pamwaka, kukilang’anya ntanda yonse, kabiji kimye kyonse bibena kutaminakotu. Pajipo kintu kimo kyatama pantu pamo, kechi kiji ku Kyambo ne. Kechi kyakukumya ne byo twabula kusangululwa kubena kutema mujilo. Tubena kukebwa kimye kya kuwamisha mu nzubo. Lesa kechi ukoba kyokyo ne poso twabwela jibiji. Tubena kukeba kimye kya kuwamisha mu nzubo.

⁸⁴ Kabiji anweba banabalume, mwaleka bakazhi benu bauba kintu kya musango yeo, kumvwala tuputula! Abo kechi ba Methodist, ba Baptist ne. Abo ke ba Pentekosito, abyoye, “musango wa bulesa, Nkulo ya Kipwilo kya Laodikeya, kyambazhi,” Pentekositi wa jizhinatu, byo byonka. Pentekositi kechi jizhina ne, ke kyakupitamo kya lubatizhilo lwa Mupashi Wazhila, akyo kitokesha bantu. Kechi kyakukumya ne amba tufwayo mpwijilo ya byalubuko bikatampe ne bintu bikwabo, pajipo kintu kimo kyaya mungi. Ke Satana, witumwene na kweseka ku . . .

⁸⁵ “Kyawama, inge twaambapo kintu kiji kyonse, bakaleka bu membala.”

⁸⁶ Vulukai, kechi batekenesha Benakilishitu ne. Benakilishitu bekala bakosakana. Ke banabalume ne banabakazhi bakwa Lesa, bemenako Lesa, nangwatu muntu aambe kyamusango ka. Anweba kechi mwafwainwa kwibapopwela ne kwibakajikizha ne, ne kwibasansa kanukufyu kabiji kwibasenda nobe baana ne. Mwanya wanekena, bijimwa byamvwangakana, kechi kyawama nangwa pachechetu ne, abo kechi bakasemununa ne.

⁸⁷ Kyavulula, nobe...Kimye kyafwenya kwipi kyabisa. Najikumona tung'onyi tucheche leelo, kokwa, tumimbya tucheche na kusenda nsono yakutwala mu bisa byato. Kechi pakapita kimye kyabaya ne batatula kufukamina, ke kutetula make ato. Mwayukatu, tung'onyi tucheche twikala na bisa byato bya make, kabiji kakonsha kwikala pa kyokya kisa kya make, kabiji ke azhokolosha inge papitatu mamineti acheche; na maulu ako kealula, kabiji kaikala ponka. Pano, inge ke aleka atalala, panyuma ya kwi akabisha, kechi akonsha kutotoka ne. Kabiji ako katumbukatu kaya na kuyuzha kajo mukanwa, kabiji kabwelapo jibiji.

⁸⁸ Kabiji mwayuka, awa ina ng'onyi mukatampe, wakonsha kwikala popa pamake, ne kwialula pa kupitapo mamineti abiji, kabiji kafwako . . . kwipana bukitapisho kwakubula ne kuja poso wakooka kya kukakalwa ne kufuma pa kisa ne. Bino kanatu, nanchi, awa inaja ng'onyi waikala mu lumvwang'ano na ng'onyi mulume, aa make kechi akonsha kutotoka ne. Nangwa kikaletu byepi, mwibasenda nobe baana, kechi bakatotoka ne. Akekalatu monka mu kisa abola ne kubola.

⁸⁹ Kabiji inge kwajinga kimye Pentekositi wafwainwa kwikala na Mulume, Yesu Kilishitu; mambo kafwako kyo tubena kufumyapo ne kana kisa kyayula make abola, kukana Lwitabilo, ne kutwela mu Kinje Kyabupopweshi, kabiji ne kwibitela mba bintu bikatampe, kwikala kwipi ne papa, kabiji kasa bamba mba “kya bumupashi.” Lukatazho luji byepi pantanda, anweba bantu baki Pentekosito? Kechi mwayuka mba Baibolo waambile bibye bintu mba bikekalako? Kabiji tubena kwamba mambo ba Methodist ne ba Baptist babena kutwelamo, kabiji ne byonse bye bintu bikwabo. Bushe kechi mubena kulanguluka mba kisungu wakosama byo aishile na kupota Manyi, akya kwajinga kimye Musongoshi kyo ayishijilemo? Kabiji abo kechi batambwile Manyi ne! Anweba mwayuka, Lapicha ukeya bufyafya bwabaya bingi, kabiji ne kushikulwa, abye bintu bimo, kechi mukayuka mba byamweka ne. Kikekala kypita, kabiji mukakumya amba kika kyamweka.

⁹⁰ Nobo byonka Yoano byo aishile panopantanda. Kabiji baambile kwi Aye, mba, “Kyawama, Baibolo waamba mba, Elaija patanshi wafwainwa kwiya.” Aye waambile mba, “Aye waiya kala, kabiji kechi mwamuyukile ne.”

⁹¹ Nanchi byo kikekala, juba jimo, bakamba mba, “Nalangulukile mba abye byafwainwa kumweka kimye kya Malwa akatampe kasa kikyanyge kufika. Nalangulukile mba Lapicha yafwajilwe kwikalako.” Byambo byakonsha kubwela jibiji, “Kya mwekele kala kabiji kechi mwikiyukile ne.” Uu-uu. Kyakonsha kumweka kukila mo mulangulukila. Oo, bukai, kipwilo! Kyawama kuleka kyokyo; Amiwa kechi nainshile kuno ku lufunjisho ne, Amiwa nakulanguluka mba Nkokomeshe kyokyo pakuuba mba mwikale na kikye ku lubaji lukwabo.

⁹² Vuluka, mulongo, Satana wamona iye mitanchi yabaya, kipwilo kimo kibena kukeba kushinda kikwabo, dinominesheni imo ibena kweseka kushinda ikwabo, kufumyamo bulubi bonse ne kwibapa kwesekwa kwa saikologi, kwikala lweseko lwa saikologi muntu kasa akyangye kuya mu mwingilo wa bumishonyi. Pentekositi! Ine, amba—mba abo kechi bo ba Presbyterian ne, abo boba Pentekositi. Kupeswa kwa milanguluko kukebewa kwa jibumba jimo ja ba Pentekosito, jibumba jikatampe, bamishonyi kasa bakyangye kuya mu mwingilo.

⁹³ Pano ibyepi umvwe bajinga na kwesekwa kwamusango yewa? Abo baji na kwesekwa. Kwajinga kwesekwa kwa ki pentekosito ku ntendekelo, byo bapembejilenga pa nzubo ya peulu poso byo kwaishile Mujilo kufuma Mwiulu, kabiji ne Bulume bwa kwa Lesa. Akya kyajinga ke kwesekwa.

⁹⁴ Kechi umo wa mu ntanda ne, wapendwako-pacheche kasa aimana na kweseka milanguluko, inge obewa wasangalala pacheche, nangwa kintu kimo, amba, “Anweba bonse pamo kafwako kyaubiwa ne.” Inge, kine kyashinikishiwa mba muntu waikala wa bumupashi uji na lubazhibazhi, aye wafwainwa kwikala mu yewa musango pa kuuba mba atwele mu Kikye. Nanchi abyo byokiji, monai, kabiji ke kulubakanya akya Lesa kyo aeseke kuuba pa myaka yavula, kabiji babwela jibiji na mitanchi yabo ne byabo bikatampe. . .

⁹⁵ Abo bekala na lusekelo inge bamona bantu bavula bapwila pamo. Kwaamba mba, “Inge Nakonsha kwibalula bonse baikala ba Assemblies! Inge Nakonsha kwibalula bonse baikala ba Oneness! Inge Nakonsha kwibalula bonse baikala ba Methodist!” Ba Methodist babena kweseka kwalula bonse kwikala ba Methodist, ba Baptist babena kweseka kwalula bonse ke ba Baptist, ba Pentekosito kwalula bonse ke ba Pentekosito! Oo, obewa kafwako kyo wakonsha kuuba pakikye ne, Lesa wibatongwejile jimo kufuma ku ntendekelo ya ntanda. Atweba twafwainwa kusapwila Mamboawama. Byo byonka. Bino, mitanchi yetu ikatampe, twayatu kungi kwakubula Mujilo. Twaya mungi ne kwilengela atweba bene mujilo walengwa ku nzubo, byonka byokyajinga.

⁹⁶ Kabiji komyunizimu wetu, pano tuji bingi na moyo, komyunizimu waiya, “Kika kimweka?” Bino, mwayukatu, kintu kikatampe kechi komyunizimu ne. Lekai ne mubule kyokyo pano, Amiwa kechi jipo na moyo wa komyunizimu ne.

⁹⁷ Pakuuba kyonji nakyo na moyo, ke anweba ba Pentekosito, akye Kije kya Bupopweshi kyo kikemusenda anweba. Akyo kyo kintu. Kikalenga kiyukilo kya lukinyama, kabiji anweba mukatwelamo. Mambo anweba mwi kabungwe, mwakonsha kutwelamo nangwa kufumamo. Akyo kyokintutu, kabiji yense wawama, wamaana, muntu wa bumupashi wayuka kyokyo. Tubena kukeba lukwabo lushimuno lwa pa kalunga-ka-meema, pano twikitana. Kabiji ba Pentekosito betu, abo babena kwikitabizha tu, bakwatako, mukachi ka mulaini, “Kikela kintu kikatampe bingi!” Kimye, ba Methodist, Presbyterian, Lutheran, kipwilo kya Kilishitu, kabiji ne ba Pentekosito, obewa wafwainwa kukana–kukana lufunjisho lobe lukatampe lwa batumwa, pakuuba mba wikale monka. Bakobatu kintu kimo. Obewa kafwapa nangwa kimo kyo ukooba mu kikye ne. Byonse bibena kukwatakanatu pamo na Loma, byonka byo kyashinikishiwa. Akyo Kinembelo byo kyaamba.

⁹⁸ Ng’anyi lukatazho luji na basapwishi lwalengela bintu kwikala muyuwe musango, kwakubula kujimuna bantu? Lesa ukebakebela ku maboko abo. Monka mu kimye kya makatazho, bajinga mu lukatazho, byo bajinga. Komyunizimu kechi ubena kutwelamo ne; kana Kije kya Bupopweshi kyo kikasenda bintu byonse. Kabiji vulukai, inge waamba mba, “Kechi...” Kyamweka, nanchi kimye kyapwa. Obewa watambula kiyukilo kya lukinyama. Obewa waikala kulubaji lwakyo pa kyokya kimye.

⁹⁹ Obewa kyakuwamina kwikala po wakonsha kufumamo ponka pano, ee, mwane, ne kubikwa katetesho ka mu Bufumu bwa Lesa. Aye Mubiji wa Kilishitu ke Mubiji wafyamika wakwa Kilishitu, ao wabatizhiwa mwi Aye na Mupashi Wazhila; kechi kunungakana Nanji ne, kutwezhiwamo mwi Aye, kutwezhiwamo mwi Aye pakwamba, Kutwezhiwamo na kwamba-mu-jimi, kutwezhiwa mwi Aye pa kubijika ne. Obewa wasemekwa monka mwi Aye, kupichila mu Mupashi Wazhila. Abye ibyo. Kyakine.

¹⁰⁰ Pano twamona bibye bintu, lukatazho lwiyatatu pa kimye kimo. Oo, diabola wibatajile ne kwamba mba, “Uu-uu, baikala bakuzhingila bukiji, baikala babena kukilauka peulu-nepanshi, na kubijika, baji na kimye kyawama bingi. Mwayuka kine kintu nyi, ponkapano kyo kimye kyami kya kwibebizha. Amiwa nsakwibakwatakanya kyonka kino kimye.”

¹⁰¹ Nanchi waimene pa katumbatumba ne kutatula kwibapupila luya lwa bulembe, woo: “Moba a bya kukumya apita. Nangwa byonkabyo, Naketekela mba abo bantu baji

bingi na lubazhibazhi. Naketekela mba bafwainwa ku—ku—kupimwa bongo kasa bakyangye kuya na kwingijila mu byaalo bikwabo ne.” Bapentekosito! Uu-uu. Monai luya lwanji lwabulembe lubena kwipaya Kyambo, “Oo, Naketekela mba Ke kintu kikwabo, Na—Naketekela kiji. . .” Monai, kubwelatu panyuma nobe byonka byaubile madinominesheni ashala, ao ye mukwakwa ye babena kwendamo. Byo bakoba, kibepaya. Akyo kyonka kimye kyo mwalenga kabungwe, akye kikipaya. Kimye kyonse byo kyubiwa. Kimye kyonse byo kikobiwa. Kechi kikemana jibiji ne. Kechi kyayukanyikwa mu jishimikila ne. Mu—mu ino nkulo ya Kipwilo kya Laodikeya, Kilishitu wajinga pangye ya kipwilo, na kunkokosha, na kweseka kutwela mukachi. Kabiji kechi bakonsha Kwikikizha ne. Kechi bakonsha kwi Kiteleka ne. Pano twatana mba, kimye kyo tubena kwikalamo, lukatazho lwatwelamo.

¹⁰² Kabiji twatana kuuba mba, byakukumya kechi bibena kubiwa ne, nobe byo kyajinga ne. Bakolwa baya ku nzubo kasa bakolwa. Kechi ke mambo akwa Lesa ne. Ke mambo akubula kusangululwa mu bantu. Kechi kujipo kusangululwa ne. Abo—abo bekala ne kuteleka; yainga kunzubo, ne kwaamba mba, “Kyawama, Naketekela mba akya kyajinga kyawama bingi. Uu-uu.” Monai, kechi kujipo lolwa lupata ne. Kechi mujipo kintu kimo mu bantu kyafwainwa kwikalamo ne.

¹⁰³ Navuluka myaka fiftiini yapita, kuno ku Arkansas, kimye kyo Najinga na mbung’eno icheche kokwa ku Jonesboro, apo bantu bafika ku fote sauzande bakebelenga kutanwako, baishile ku mbung’eno mu muzhi wa pepi nobe fiftiini sauzande. Kabiji balajilenga mushi ya myotoka ikatampe ya butonge ne bintutu bikwabo, kabiji bamveta bipepala pa baana babo bakolwa, pakuuba mba batwele mukachi. Abo baiklele mu bipona byabo kabiji kechi bafuminengapo, mute ne bufuku ne, kabiji bajinga na batemwe baabo bebaletelenga ka shinkwa ne—ne mutumwa wa byakutoma byatobala; kabiji baikala ponkapa, mute ne bufuku, mute ne bufuku. Michima yabo yapilenga, na mujilo. Kakintutu kacheche Lesa nkoaubile, kaambwile mujilo. Kabiji ma aduleendi ba mwiabo batwelele.

¹⁰⁴ Aye ukijitu Lesa umo, bufuku buno, byonka byo Ajinga myaka fiftiini yapitapo. Aye ukijitu Lesa umo, bufuku buno, byonka byo Ajinga kimye kyo Alengele meulu ne ntanda.

¹⁰⁵ Pano kyookika? Twaikala na lusekelo kabiji ke kukeba kushimika tubungwe, bakebelenga kushimika *kikye*, ne kushimika *kikye*, kabiji ne kulengamo kintu kyabaya kabiji kyabeka, pakuuba mba besakanye pamo nabena Joneses, na ba Methodist, na ba Baptist, na ba Presbyterian. Obewa kechi wi wamwiabo ne. Ine, kechi byo uji ne. Ke bantu ba ki dinominesheni, akyo kijitu bulongo, kafwako kyatama kwi abo ne. Muji bavula Benakilishitu bawama mukachi kabo, bino kechi wafwainwa kukwatakana nao aa mabumba ababula kwitabila

ne. “Bantu bakana Bulume bwao,” obewa kechi wafwainwa kwikala ku lubaji lwabo ne.

¹⁰⁶ Anweba mwayuka, lukatazho lujipo ke luno, mubena kweseka kuleta Hollywood mu kipwilo. Kintu kyo mwafwainwa kweseka kuuba ke kufumya Hollywood mu kipwilo. Mwamona? Anweba mubena kweseka kuwamisha kishimikwa kyenu, anweba mubena kweseka kubaisha dinominesheni wenu, poso kyaikala kya kukebula milanguluko ya bantu. Atweba kuuba twaya ku lubaji lukwabo ne. Twafwainwa kwikala nabo ku lubaji lwetu. Bintu byonse bibena kubembela, vulukai, Hollywood ubekauka na bya mukyaalo, akwe Mamboawama atema na kwikepesha. Paji lupusano lwabaya bingi pakachi ka kubekauka ne kutema. Ao Mamboawama atema na kwikepesha, ne bukimote, kabiji kwikepesha, ne bulume. Kimye, Hollywood ubekauka, kabiji bantu bonse batakaika ne kubijika, kabiji ne kuya konka. Mwamona? Kechi tukeba kyokyo ne.

¹⁰⁷ Twafwainwa kwikala kyokya Kyeya. Aye waambile mba, “Anweba mwi mukele wa panopantanda.” “Inge mukele wataya kutobala kwanji,” abo bo bulume bwa Mamboawama. Twafwainwa kwikalapo na kintu kimo kibena kwenda mu bipwilo byetu, kya kuuba mba ba Methodist, Baptist, Presbyterian, ne bonsetu, bakonsha kukabila kwiya. Twafwainwa kwikala bu mukele! Mukele ulenga kilaka, ulengela kilaka. Mukele watobala, inge walamata. Wafwainwa kulamachila.

¹⁰⁸ Kabiji twatana kuuba mba, aba bazhingila bukiji beseka kwesakanya pamo na ba Methodist ne ba Baptist, na bishimikwa byabaya ne mampuzha akatampe, ne bantu bafunda bulongo, kabiji masukuulu akatampe ne makoleji abaisha, kabiji ne byonse bya musango yewa. Atweba twi bantu bazhingila bukiji, kabiji ponkapo lukatazho lwatwelamo.

¹⁰⁹ Kabiji milanguluko ya bumupashi izhokoloka ne kwaamba mba, “Apo, pembelaiko mineti umo, bushe atweba bonse tukatwela mu Kije kya Bupopweshi? Bushe jibumba jenu jonse jikatwela mukikye nyi?” Kine, mubena kutwelamo. Akyo kine. Anweba monaingatu kana kechi kikobiwa byobyo ne. Aye Baibolo waamba mba byo kikobiwa, monka mo, kabiji Kilishitu ukekala pangye. Ng’ondo wafichile mwine kimye kya kwa papa (mutanshi wayile ku Loma), bufuku bukwabo, kwimumweshi kiyukilo mwiulu. Kyakubula kuyukila jimo ne, kyaubiwe. Musango Nkambo mo abena kubila bintu mu jino juba, kyakukumya!

¹¹⁰ Pano mu kikye kimye kya mfishi, byo bajinga popa, lubesha waishile. Luketekelo lonse lwa kupuluka lwapwile. Pano mukooba byepi inge dinominesheni wenu waya mu Kije kya Bupopweshi? Kika kikamweka ku byonse bintu byetu bikatampe byo twashimika pano pantanda, luketekelo lwapelako lwapwa?

111 Bino mwayukatu, nobe byo bajingatu pepi na kubijika, kabiji luketekelo lonse lwapwile, kechi bakonsha kupuluka ne; kabiji ponkapotu, bamumwene Aye waiya, kasa enda pa meema. Mu kimye kya mfishi, Aye wayishile, kasa enda.

112 Mwayuka kine kintu nyi? Byo Ebashiile, Aye wayukile mba kisakumweka, nanchi Aye wakajijile pa mutumba walepesha wa yoya ntanda. Inge waisha palepa, wakonsha kumona palepesha. Kabiji Aye wakajijile peulu pakuuba mba Aye ebamone, mwayukatu.

113 Kabiji Aye wayukile mba akye kibena kwiya. Aye watongwejile jimo jino juba amba jikekalako. “Byonka byo kyajinga mu moba a Sodoma, nanchi byo byo kikekala ne pakwiya kwa Mwaana muntu, kimye Mwaana muntu po akasololwa.” Nanchi, Mwaana wafwainwa kusololwa. Kino kisemi kya bubi ne kya bukende kikakeba kiyukilo. Kikekala na kiyukilo. Bakekikana byonka byo baubile pakyokya kimye, bino kikekala kiyukilo kya lusanguko. Aye ukijitu mumi, na kuuba byonka byo Aubile.

114 Twatana kuuba mba, mu kino kimye kikatampe, aba banababwanga bajinga bakatezhiwa, Aye wakajijile peulu pakuuba mba Ebamone. Aye waikela popa pa katumba, na kwibamona.

115 Kabiji pano Aye kechi wakajijile mutumba pa kikye kimye ne, pakuuba Aye wakajijile kufuma ku bilende, wakajijile kupita mu mwela, kupitaila ng’ondo, tubaangabanga, poso byo Ayile peulu pene watajile panshi pa kuuba mba amone Mwiulu. Kabiji Aye waikela popa, Peulu pene. Pano jiso Janji jiji pa kang’onyi, kabiji Nayuka mba Aye ubena kwitumona. Aye ubena kwitumona.

116 Kabiji mu kino kimye kyamfishi, apo bipwilo po byaya mu mitanchi ikatampe, kabiji baji na *yuwe* mutanchi ne *yewa* mutanchi, byonse byabikwa mu mutanchi byonka biji bipwilo byose, madinominesheni. Kabiji kika kyaubiwa? Mu kino kimye kyamfishi, mu kimye bantu po bayulwamo-na bumupashi bakumya, “Kika kikamweka? Talai pa baana bami!” Awa mwanamulume waambile mba, “Tala ku bakazhi bami! Talai pa *kikye!*”

117 Kabiji balupuka Pamulungu, nangwa milombelo ya bufuku Pakisatu, bukijitu, nanchi baya na kutamba *Atweba Twatemwa Sacy*, nangwa kintu kyayewa musango, pa televizhonyi. “Batemwa bya muntanda, kukila byo batemwa Lesa.” Kasa booba nobe abo.

118 Amiwa nabujile inetu juba jikwabo, wavwajile ndeshi yakwata ku mubiji. Naambile mba, “Nyenga, ayo ndeshi yakwata bingi ku mubiji. Kechi kyakonsha kumweka kuwama kwi amiwa ku kubuula kyokyo ne, bino byo kiji. Obewa wi Mwinakilishitu, kabiji wakonsha kwikala kyakwitutulako.”

119 Waambile mba, “Kyawama, Mulongo Branham, wayuka kine kintu nyi?” Aye waambile mba, “Awe ye yenka musango ye babena kulenga.”

120 Naambile mba, “Bakipotessa bipe, kabiji baji na mashinyi a kusonenako. Kechi kujipo mwakubepela ne.” Ee.

121 Telekai, leka kubuuleko kintu kimo, mutemwe wami. Kechi kutongola obewa ne. Ine, mwane. Amiwa mbena kweseka kukufumyamo mu kukwe kumanyikwa. Kikulutu awa mupashi uji mwi obewa, obewa ukekyuba. Abyo ibyo. Obewa wafwainwa kusemwa kufuma mukikye. Pano obewa mwine wafwainwa kwibika pa yoyo ng’ambilo, nangwa byonkabyo leka nkubulepo kintu kimo, mwamona, “Kuji muchima obe, kokuji bunoshi bobo.”

122 Leka nkubuule. Obewa wafwainwa kwikala nobe kikwibu ku mulume obe, kabiji wakonsha kwikala watooka nobe kikwibu, nsongwakazhi, ku mulunda nobe nsongwalume, bino juba jimo Lesa ukakufwisha nao a kuuba mambo a bukende. Obewa wazhatwa inge wamvwala yewa musango. Yesu waambile mba, “Yense utala pa mwanamukazhi na lwiso lwa kumukumbwa, waubila nanji jimo bukende monka mu muchima wanji.” Kabiji umvwe awa mwanamulume ukazhatwa, awa ndengamambo, pa kukutala obewa, ng’anyi wimwesheshe kwi aye? Langulukaipo pa kikye. Anweba banabakazhi baki Pentekosito, buvu bwimukwate! Mwamona? Buvu bwimukwate!

123 Amiwa nemutemwa, oene mambo o Mbena kwambila kyokyo. Butemwe bolola.

124 Tuji pa kimye kya kunyemena bintu lubilo, kunyemena mvwajilo ikatampe. Kijitu pamo nobe, kabiji kiji mufwashi wa muntanda. Aye waambile mba, “Kechi mutemwe ntanda ne, nangwa bintu bya muntanda ne; inge wikyuba, butemwe bwa Lesa kechi buji mwi obewa ne,” Amiwa kechi natako muchima nangwa wambe byepi mujimi, watolokela peulu ne panshi, wazha, watenda suki, ne kumvwala mandeleshi aji yewa musango. Anweba banabalume mwikiswisha. Bipangwa byenu bibuulang’ana pepi pomuji. Abyo kine ibyo. Kechi kyakukumya ne tuji mu kivundakanya kyabaya, kabiji ne lubesha wa komyunizimu, lubesha wa tanchikilo ya bipwilo, lubesha wa kipamo kya bupopweshi!

125 Ke—ke kimye kya kutwelamo, ke kimye kya kwikala bumembela. Bipamo bitala pa bamingilo babena kunembesha bamingilo, ne kuleta myendeleko. Byaalo biji na—ba United Nations, babena kukwatakana. Bipwilo bibena kukwatakana pamo. Kibena kumweshwa kika? Kibena kumweshwa mba Kilishitu ne Musongwa baji pepi kukwatakana. Abyo byo kibena kwamba. Byonse bye bivule bibena kumweshwa kwiya kwaitabilwa. Pano

monai byo tubena kupwisha, mambo Amiwa nataya kimye kyabaya.

¹²⁶ Kabiji pano monai, mu kyonka kya kimye kikatampe apo luketekelo po lwapwile, lwa kupuluka, abo bamwene Muntu umo ubena kwiya, kasa enda pa meema, waendelenga na kwiya. Kabiji akya kintu, lubaji lwa bulanda, telekai bulongo, kintu kyakonsha kwibakwasha, kyo kyo baumvwijilenga moyo. Baambile mba, “Kyamweka nobe kimonwamonwa. Byo kyafwainwa kwikala, mwayukatu, mupashi.”

¹²⁷ Inge akya kechi kyamweka jibiji ne! Abo banji na moyo wa Kikye. Abo baji na moyo wakubulang’ana byakulutwe, baji na moyo ku kintu kiji nobe bulume bwa diabola; kimye Yesu kyo aambile mba Kikamweka mu jino juba. Kintutu kimo kyakonsha kwibakwasha ke Yesu Kilishitu. Kechi dinominesheni mukwabo ne, kechi byonse kukwatakana pamo ne; akyo kikekilengelatu kutaminako. Kintutu kyakonsha kunkukwasha ke Yesu Kilishitu.

¹²⁸ Kabiji Aye byo alaile kubwela mu ano moba apelako, mu yuwe musango, ne kuuba kikye, kulaya (nobe mwaana wamulume kasa akyangye kubwela kwi Abulahama, lukunwa mutanshi) awa lukunwa wabufumu wakwa Abulahama, Yesu wakonsha...waambile mba bakamona kintu kimo. Kasa akyangye kwiya Mwaana walailwe, Lesa ukesolola Ayemwine mu mubiji ne kuuba byonka byaubile Yesu, nobe byo Aambile mba Aye ukooba, nobe kyaambiwe mba kikobiwa mu mooba akapelako. Kabiji papo milaye yonse, yo twakonsha kwamba, mu kuvula kwayo, monka muno ku meso enu, amba kikye kyafwainwa kubiwa.

¹²⁹ Kabiji bipwilo, byafwainwa kutambika maboko, na kwi Kitambulwila, “Amiwa naumvwa moyo pa Kyokyo. Kechi kya kulubaji lwetu ne, mwamona.” Kabiji be Kichiina bingi. Kintutu kyakonsha kwibaleta kwi Kilishitu, ke Kilishitu Ayemwine, kabiji baji na moyo mba kibena kuchinisha. “Oo, Amiwa kechi nayuka ne. Akya kyakonsha kwikala kimonwamonwa, mwayukatu. Kabiji Amiwa kechi Nekiyuka ne.” Moyo wa kintu kyonka kyakonsha kwibakwasha.

¹³⁰ Kabiji mu kyokya kimye kya mfishi ya kijikila, akya kipwilo kyasalwa, aja jibumba jaikala popa, jachiina mba ke kintu kyabula kuyukanyikwa, abo kechi bajipo na kintu kya kwingila nakyo ne. Nanchi kwaishile joja Jiwi jawama, “Kumvwa moyo ne. Amiwa Bano.”

¹³¹ Aye ye Kyambo, kechi byo Aji nenyi? Aye kechi upipulwa ne, kwikala Kyambo. Pano kuuba mwaumvwa Kyambo kyaamba, bufuku buno, “Aye ujitu pamo keesha, leelo, ne myaka yonse. Kechi muvwe moyo ne; Amiwa bano”?

Twayai tukunyike mitwe yentu.

¹³² Taata Wamwiulu, ma—mabaanga kwakaba. Bimye byafita, Mujilo wafuma pa kitapisho. Anweba mubena kupupula mwaya bujimi. Anweba mwaambile mba, “Abo Bufumu bwapasha nobe muntu watolele bukonde ne kuya ku kalunga, ne kwibuta pameema, kabiji byo ebufumishe. Abo Bufumu bebupashang’enye byonkabya.” Nkambo Lesa, juba jimo aja jisabi japelako jiji mu meema! Anweba mwaambile mba, “Basendeletu misango yonse.” Abwa bukonde bwa Mamboawama bukwatatu misango yonse; bukwata bakovu, masabi, batangatanga, miloolo, ne basong’ameno. Atweba kechi twayuka bintu byo kikwata ne, bino mwajinga masabi Anweba o mwakebelengamo. Aweba Yenu Chibishi wa mambo. Pakuuba twavuluka, bukiji bukiji bakovu, kisakisa, ne byonse, byabwela mu mateshi jibiji, byabwela mu meema. Pakuuba juba jimo aja jisabi japelako jasalululwa, jatongwejiwe jimo kwiya, lubaji lwa Mubiji wapelako, jikakwatwa kufuma pa kyokya kizhiba.

¹³³ Anweba mwatele bukonde mu moba akwa Luther, ne Wesley, Alexander Campbell, John Smith, Calvin, Knox, Finney, Sankey, ne bakwabotu; mu nkulo ya Pentekosito, mu moba akwa F. F. Bosworth, ne Frochman, aba banabalume bakatampe. Anweba mwatele bukonde, mooba akwa Billy Sunday, kuya ne kulutwe kwa nkulo.

¹³⁴ Kabiji pano Anweba mu kikubaulatu mu kalunga. Mujipo umo waikala monka bufuku buno nyi, Nkambo? Inge byokiji, lekai bekale nobe yewa mwanamukazhi mucheche ku mushima. Nangwatu mu musango wanji wa bupite, aye wimuyukile mba Anweba mwi Mesiyasa. Aye wamwene kyokya kiyukilo. Akya kyajinga ikyo. Aye waambile mba, “Nayuka mba Anweba mwi ngauzhi.” Aye kechi wayukile mba wafwainwa kwikala Mesiyasa ne. Aye waambile mba, “Tubena kupembelela Mesiyasa,” mu byambo bikwabo. “Twayuka mba Mesiyasa byo akeya, Aye uketubula bibye bintu.” Kabiji Anweba mwaamba mba, “Amiwa yami Iye.” Abye byo kyajinga.

¹³⁵ Pano, bufuku buno, Nkambo, balekai bekimone, “Yami Iye; kechi mube moyo ne. Ke mulaye Wami.” Bukai bakolwa, Nkambo, mpulushai balubilamo, bayuzhai babulwamo bintu.

¹³⁶ Lekai tulupuke bufuku buno, na kwaamba mu michima yetu, byo tubena kupalang’ana, nobe booba bafumine ku Emasa, “Bushe michima yetu kechi ibatemenga mukachi ketu Aye byo akwingilanga bufuku buno mu kishimikwa, Kyeenyi Kyanji Kyabulesa!” Bayukile byepi amba kyajinga Anweba, be mwichile Anweba mwatwela ne meso abo a shikukile. Lekai ateba bonse, bufuku buno, emwite Anweba mutwele. Inge kechi Twikikwatakanya ne, lekai twiimwite Anweba mutwele, nangwa byonkabyo. Ajo jo jonka jishinda Anweba jo mwakonsha kwisolwelamo Anweba bene.

137 Kabiji twamona Anweba byo mwisolwele Anweba bene panyuma ya lusanguko Lwenu, Anweba mwaubile kintu kimo mu musango umo Ye mwaubijilemo Anweba kasa mukyangye kupopwa. Pano iyai bufuku buno, Nkambo, Anweba mwaambile mba Anweba “mujitu pamo keesha, leelo, ne myaka yonse.” Ubai ne jikwabo, kubila atweba, nobe Anweba byo mwaubile mu moba o Mwaimene mu mubiji, panopantanda. Atweba tukaya ku nzubo, na michima yasekela, nobe booba. Mu Jizhina ja Yesu twalomba. Amena.

138 Pano mu kupwila, bufuku buno, Nayuka mba kwakaba bingi, kabiji tuji na mamineti tweti pakuuba mba tufumemo na kimye. [Kafwapo bijipo pa tepu ne—Waku.] Amiwa . . .

139 Amiwa kuuba naleka nangwa kukanya bintu byo Nguba ne. Amiwa ntangijilwa na Kintu kimo, Amiwa kimye kyonse byo nguba, bumi bwami bonse, kabiji kimye Kyonse kikala kiji bulongo. Kechi kyakimbulapo kingi ne kana kiji mu Baibolo. Amiwa kuuba ne kileka ne. Amiwa kafwako kya nakonsha kuuba pa kikye ne. Kikyubatu, nangwa byonkabyo. Kabiji Amiwa ngikala waketekela, inge Amiwa naikala wakokela, kuji muntu umo wikikabila. Kabiji Amiwa nkekala wakishika. Kabiji pa joja Juba, Nakeba ku, nobe byaambile mukatampe Paulo Wazhila mba, “Kechi kujipo mashi a muntu ku maboko ami ne.” Uu-uu. Na—Nasaka kwimubula anweba Bukine. Kechi nobe byo Mbena . . . Nemutemwa anweba.

140 Kabiji inge wajinga na nsongwalume mucheche . . . Pano kilangulukaipo, inetu, anweba ye Nakulengulula kimye kyapita panyuma, anweba banyenga na suki ya kwichika ne bintu bikwabo. Inge Amiwa . . . Inge wajinga na nsongwalume mucheche waikala mu mukwakwa, kabiji waamba mba, “Junya, mutemwe, fumamo, mutemwe. Kyafwainwa kwikala, Amiwa kechi nayuka ne, kapepo basakukusezha.” Anweba kechi mwatemwa yewa mwaana ne. Abyo ibyo. Wafwainwa kuyako na kumusuba kikoba, nangwa kumwambila watwela. Abyo ibyo. Obewa wamutemwa.

141 Awo ye musango ujimo Mamboawama. Lesa wi mutemwa. “Kabiji bonse Aye bo atemwa, Wibafunda ne kumulengulula mwaana yense wiya kwi Aye.” Inge kechi wakonsha kufundwa ne, mfumako kabiji wazhingila pa kikye, nanchi anweba mwi baana ba mubukende, anweba kechi mwi baana ba Lesa ne. Nanchi vulukaitu, ke Kinembelo.

142 Pano kyambo kimo kufuma kwi Aye, kyambo kimo, kyakonsha kulumbulula byavula kukila byo nakonsha kwamba, bimye mamilyoni. Ke Aye. Twayuka mulaye Wanji. Twayuka kyo Alaile kuuba. Pano Amiwa kechi nayuka ne kana . . . bushe . . . atweba tukafuma . . .

143 Beshe wajikupana bitupa jibiji? Bushe mwajikupana bitupa leelo? Kyajinga kika? J, kijitu bulongo. Kijitu bulongo, pakuuba

tupulusheko kimye, twayai tutape kufuma pa nambala wanu. Pano, kaepo baji monse mu kishimikwa. J, nambala wanu.

¹⁴⁴ Kabiji pano tuji na byakwipachika. Twatatwile kufuma, kimye kimo, kufuma *kuyuwe* umo, ne jikwabo, bamo kunyuma ne kulutwe, kabiji ne kuzhokoloka, bino twibatana kasa bepachika. Pakuuba bantu bonse beya, pajuba pajuba, baji na jishuko ja kwiya mu mulaini. Akyo kechi kyalumbulula mba mambo uji muno ne . . .

¹⁴⁵ Baanga bayuka, mu ino mbung'eno, kuji bavula babukwa mukachi ka jibumba, nobe byo babukilwe nyi? Kine, mwi kiyuka. Monai, kintupa kya milombelo kikalatu kya kuleta bantu kuno, mwaleta Mupashi Wazhila mukachi ka bantu, nobe byonka byo mwapijilwa kuuba byobyoy. Atweba kechi tukeba ne kwikala nakyo pa kino kimye ne. Twakonsha kushapo bitupa bya milombelo.

¹⁴⁶ Nobe byonka byo twaubilenga bufuku bwapita, kechi twajinga na bitupa bya milombelo ne. Aye Mupashi Wazhila wayile mukachi kabo aba babujile bitupa bya milombelo ne. Kabiji Namwene bintu byavula bingi byo Nabujile kwambapo, mambo kechi Nayukile mba byo kiji nangwa ine. Kyajinga na mfishi pakachi kabo, kabiji Amiwa ne kilekeletu. Amiwa kechi nayukile ne. Inge kechi kyaletlepo kyawama pa kwibeta ne. Kyonse kyo Aamba kijitu bulongo, nanchi telekai ku byo Aamba.

¹⁴⁷ Pano bushe mwajikwamba mba J? J, nambala wanu? J, nambala wanu. Ng'anyi uji na kyokyo kitupa? Sutulai kuboko kwenu. Obewa wafwainwa kwikala na kilubo, mwaana; wafwainwa kwikala umo . . . Oo, Ndekelaiko mambo. Oo, kunyuma kwine washakamina ku kibumba. Iyai kuno, inetu. Pano—pano letai bibye bitupa, nsongwalume, Mulongo Borders nangwa Billy, umo, kimye kimo kikala bonse babiji, mvwangaulai byobyoy bitupa byo muji nabyo, kabiji ne kwimupa kitupa kyenu, kyonse kyo mubena kukeba. Atweba kechi twayuka ne, abo babena kuuba . . . *Awe* wafwainwa kutola nambala faivi, kabiji *obewa* tambula nambala sebeni, *obe* utambule nambala fifitiini, kabiji *awa* naite-faivi, kabiji kechi twayuka ne. Kabiji pano, ne jikwabo, inge Naiya, Amiwa ngubatu, kyonse kyaiya pa muchima wami, Amiwa ngita kyonkakyo, kechi ene mambo ne nangwa kiji kwepi. Amiwa ngubatu . . . Inge Naamba mba . . . Kimye kimo Amiwa mbelenga baanga baji muye mulaini, kabiji ne kwibabanya ku baji muyuwe mulaini kabiji twatambula mukumbu. Mwamona? Kabiji pano, inge Nabula, kika, Amiwa ngubatu . . . kyonse kyaiya mu milanguluko yami patanshi, kyo Ngita.

¹⁴⁸ Nambala wanu. J, nambala tuu. Nambala tuu, nambala fili, nambala foolo, nambala faivi, nambala sikisi, sebeni, eiti, naini, teni, lekai beye, mwamona. Wanu, tuu, fiili, foolo, faivi, sikisi, sebeni, eiti, naini, teeni. Akyo kyawama. Ajo jo jishinda,

ja kwishilamo . . . Pembelaiko, umo wapita kulubaji lukwabo. Amiwa najinga . . . Wanu, tuu, fiili, foolo, faivi, sikisi, sebeni, eiti, naini. Abyo ibyo. Pano, papo, iji ke, teeni. Kijitu bulongo.

¹⁴⁹ Leveni, twelufu, satiini, fotiini, fifitiini. Ke kubikapo bakwabo faivi. Wanu, tuu, fili, foolo, faivi. Kyawama, akyo kyawama.

¹⁵⁰ Sikisitiini sebetiini, eitiini naitiini, tweti. Wanu, tuu, fili, foolo. Namonapotu foolo. Tweti, bushe tweti wajikukumbula? Kijitu bulongo. Bino, kechi tubena kukeba kwikala na bavula baimana pa kimye kimo ne. Pano inge twapwisha nabaabo, kabiji kimye kokiji, tusakusenda ne bakwabo. Atweba kechi twita . . . Kapepo atweba . . .

¹⁵¹ Twayai twesekeko ne bakwabo bacheche. Twayai tweseke faivi. Tweti-wanu kufika ku tweti-faivi, mu J, lekai bemane inge bakonsha. Tweti-wanu kufika ku tweti-faivi. Wanu, tuu, fili, kunyuma kwine, foolo. Wanu, tuu, fili, foolo, ne faivi. Kiji bulongo, pano twayai twimene ponkapo. Kuji tweti-faivi mu mulaini, kabiji abo—babena kutatama mu mulaini kukwe.

¹⁵² Pano Mbena kwi mwipuzhapo bukwasho bumo. Anweba pano taiko maana . . . Panai kwi Lesa muchima wenu yense, fifitiini alondelapo, manineti sikisitiini. Mwakonsha kuuba kyokyo nyi? Kabiji usa kuuba kikye nyi, shikulai muchima wenu? Pano vulukai kyo Naamba. Kechi mwibileke bipite kunyuma yenu ne, nobe meema abena kuponena pa nyuma ya jimbata, nobe biji kishipi. Kechi mwakonsha kuuba kyokyo ne. Vulukai Kikye.

¹⁵³ Inge Nakubula kintu kiji kyonse kyabula mu Kinembelo, ne mu mulaye wa kimye, obewa wafwainwa kumona batangi kuno ne abo baiya be kimbuula. Abyo ibyo. Amiwa—Amiwa kechi funjishapo kintu kikwabo ne kanatu kiji mu Kyambo. Kabiji inge Naikala bulongo na kyokya Kyambo, kabiji inge Naamba mba Kiji byobya, kabiji Lesa . . . Kiji mu Baibolo. Inge Malaika wa Nkambo wambula kintu kyabula mu Baibolo ne, kechi wakonsha kwikala Malaika wa Nkambo ne. Abyo ibyo. Aye ukyangye nangwa kimye kimo nkumbulapo kintu kimo ne kanatu kiji mu Kyambo, kabiji ne anweba mwi bakamonyi. Aye ukyangye kwambapo kintu nangwa kimo, mu byobya bya maaduleendi bya masauzande ne masauzande, kabiji ne mumilaka ya pantanda, Aye nangwa kimye kimo kechi waambapo kintu kiyatama ne, nangwa kwambapo kintu kyabula kufikizhiwa ne.

¹⁵⁴ Telekai. Ipuzhai batangi ne abo baji kuno. Abye byonse byo mumona kuno, ke lubaji lucheche lwakyo. Abyo ibyo nyi, balongo? [Abo balongo baamba mba, “Kijitu bulongo.”—Waku.] Kika, akwa, kabiji ne mu bumi bwa pa muntu bunke bwanji, apo po Aamba mba, “Yanga ku *iy*e mpuzha, ukamone *kikye*. Kabiji *kikye* kikeya kufikizhiwa. Kabiji wambe *bibye* papo, yanga *kukwe*.” Kitwajijilatu na kubiwa, kimye kyonse, monai,

pa mwaka pa mwaka. Bantu baji mu jibuba bamonatu—bintu bicheche. Pano ikalai na munema.

¹⁵⁵ Pano muntu yense uji mu mulaini wa milombelo, waimana muno, mwibenyi kwi ami? Sutulaiko maboko enu inge byo uji. Kijitu bulongo. Baanga baji muno, bayuka mba Amiwa kechi nayukapo kintu nangwa kimo pe obewa ne? Sutulaiko kuboko kwenu. Pano kimye kicheche. . . Ne musachila. Amiwa kechi natako muchima na mambo a nkomuji ne, inge muji pa kibamba kya peulu, washakamina ku kibumbulu, panshi *kukwe*, konsetu kouji. Amiwa mbena kuuba. . .

¹⁵⁶ Pano, akye ke kya kubuwame bwenu. Akye ke kyenu kya kumwenamo. Monai, akye ke kyabukwasho bwenu.

¹⁵⁷ Nakulanguluka mba awa wajinga mukana wamulume wajikwambanga kwi amiwa, bino kechi ibyo ne. Amiwa njina mukana wamulume muno kuntu kumo, bufuku bunu, aye uji pa kikye kimino, kabiji Nakulanguluka mba Paulo wa mucheche. Aye kimye kyonse wamba mba usa kwiya, ne kwimana pa pulatifomu, ne nkusapwilako, kabiji ukyangye kufika pa myaka ibiji ne. Nalanguluka mba awa nsongwalume wa mucheche ubena kukeba bainanji.

¹⁵⁸ Nanchi vulukai, Amiwa mbena kweseka kwimukwasha. Ami. . . Lesa wayuka kyokyo. Amiwa mbena kweseka kukwasha, mwamona. Pano talai, Amiwa nakeba mba anweba mumwenemo, inge Aye eye mukachi ketu.

¹⁵⁹ Pano kilangulukai, Muntu wa bu Yesu Kilishitu kwingijila mu mubiji, nobe byo Alaile mba Aye ukooba kumpelo. Baanga bayuka mba Aye walaile kyokyo? Byonka byo kyajinga kokwa ku Sodoma, Malaika kasa avundaminako nyuma Yanji, kabiji ne. . . Awa wajinga Lesa. Mwaketekela mba awa wajinga Lesa nyi? Baanga baketekela mba awa wajinga Lesa? [“Amena.”] Kine, byo kyajinga. Aye Baibolo waamba mba byo kyajinga. Kabiji Aye, Yesu, wikitongwele. Pano monai.

¹⁶⁰ Pano anweba koko mwabula bitupa bya milombelo, Nakeba mba mungubilepo kintu kimo, konse ko muji. Pano vulukai, abye bintu, monai Inge mwabuulwa mba wabukwa, nangwa byonse byo Wabuulwa mba ube. Monai byo Kyaamba. Inge Kya kubuula, ako ke kubaisha lwitabilo lobe. Kabiji pano umvwe lwitabilo lwafika pantu pamo, obewa yangatu umuswe Lesa. Kechi ke amiwa ne, mambo Taata wa Mwiulu wayuka.

¹⁶¹ Amiwa natala ku yuwe mulaini kukwe, Amiwa kechi namonapo muntu umo ye Nayuka ne. Amiwa kechi namonapo ne kanatu babiji nangwa basatu mu jibumba jonse, bo Nayuka. Kabiji Amiwa kechi nayuka ne, pakino kimye, Nakonsha kwamba mba, mweshaiko umo. Amiwa nayuka mba Edmund Way wajinga kuno mamineti acheche apita. Nakulanguluka mba Namumona, kabiji Na—Namupusa. . .

162 Inge kechi Nauba kilubo ne, Namona muntu umo ye Nayuka, ke mwanamulume ne mukazhi wanji, ne kansongwakazhi kakacheche, watelwa mba Fritzinger, kufuma ku Ohio. Iye wa, yobe Mulo- . . . *yobe* Mulongo Fritzinger? Waikala nobe uji mu kibela kicheche kiji. . . Ao Mulongo ne Nyenga Fritzinger, kufuma ku Ohio, balunda nami.

163 Kabiji pangye yakyokyo, waikala kunyuma kokwa, ke. . . Namona ku lubaji lukwabo kukwe, kuji mwanamulume mukote wa myaka ibena kuya mu manaite-tuu, wa jizhina ja William Dauch. Aye ne mukazhi wanji. Mukazhi manase. William Dauch, ku Ohio, ke mulunda nami bingi. Kechi kapita kimye kyabaya ne, aye wajinga, na myaka naite-wanu, muchima wanji wakakelwe kwingila, muchima kuleka kwingila, kabiji mukazhi wanji wangichile, amba ngyeko ponkapotu, aye wafwilenga ponkapotu. Kabiji pa. . .

164 Aye wajinga mulunda nami wawama bingi. Palwendo lwami lwa kuya na kumumona, Najinga wasakamana bingi. Kabiji Amiwa naimene, kabiji jiwilo jami jimo jafumine mundonda yajo, ja chibilenga taila wami mu bipimvwa, kabiji Naile ku kitesheni kya ku Texaco, napotele manyi, baishile, bamumwene. Kabiji Natajile peulu, Namwene Mulongo Dauch ubena kwenda mu kipwilo kyami, na kusukenya kuboko kwami. Naambile mba, “Nkambo Atotwe.” Kabiji Nantajile kunyuma kukwe, ke eye mu mukwakwa, kabiji waimwine kuboko kwami. Naile kwi aye.

165 Namwene dokotala wanji, mwananyike mu Yudeya, nangwa mwanamulume wa myaka-yapakachi, mwanamulume wa ki Yudeya. Kabiji Naambile mba, “Pano nga aye, dokotala?”

166 Waambile mba, “Aye kechi ujipo na kimye kya kulwisha ne.” Waambile mba, “Uji ku onkosijini.” Waambile mba, “Aye ukafwila ponkapa.” Aye waambile mba, “Vulukai, aye uji na myaka naite-wanu.”

Naambile mba, “Ee, mwane.”

167 Waambile mba, “Ke ku kakalwa kwa muchima kwapwijijika. Kafwako nangwa kimo kyakonsha kubiwa ne.” Waambile mba, “Ke kimye kyakuya.”

168 Kabiji Naambile mba, “Ee, mwane. Bino, ine, kechi ubena kuya ne. Abyo byo byonka.”

169 Natwelele mukachi, nabikile kuboko kwami mushi ya tente. Naambile mba, “Mulongo Dauch, wakonsha kung’umvwa nyi?” Aye wantajile. Pano kine, mu jizhina janji, ke mwina German, D-a-u-g-h, kabiji Nenjita mba Dauch, mwamona. Kabiji Na— kabiji Nabikile kuboko kwami mushi ya tente, kabiji Naambile mba, “Obewa ubena kung’umvwa nyi, Mulongo Dauch?”

Aye waambile mba, “Ee.”

Naambile mba, “Obewa kechi ubena kuya ne. Amiwa na kumona kechi ubena kuya ne.”

¹⁷⁰ Mulungu umo kufuma pa kyokya kimye, waimene mu kipwilo kyami, ng'anyi waishile na kupita mu kipwilo ke Mulongo Dauch! Nafumine mu mbung'eno ne kuya kubunshiya bwa mukola, ku nzubo ya manjila, na kuja. Kabiji byo Nalupukile mu motoka, na endelenga mu mukwakwa, Mulongo Dauch ke eye kasa atambika kuboko kwanji. Abya bimwesho kechi bikakalwa ne.

¹⁷¹ Kabiji awa mwanamulume wa myaka naite-wanu, kabiji ulondela mbung'eno iji yonse, wajingako ku California. Wakonsha kusutulako kuboko kobe, Mulongo Dauch? waikala popa, pakuuba mba bantu bamone mushilikale mwine byo aji. Kuno, waikala monka muno, monai, wa myaka naite-wanu, kabiji ulondela mbung'eno yonse. Inge Amiwa nji pa tabbanako, aye wendesha pajuba pajuba aduleendi mailoshi, na kung'umvwa kusapwila byambo bicheche, kabiji ne kubwela. Lesa, "Kukekala Kyeya mu kimye kya mabaanga abufuku."

¹⁷² Naambile, juba jikwabo Naambilenga kwi aye, Naambile mba, "Kika kyo Nakonsha ku kuubila obewa, Mulongo Dauch?"

¹⁷³ "Kya kukabila kimotu, Mulongo Branham. Inge Aye waiya, Nakeba kuya Nanji."

¹⁷⁴ Naambile mba, "Kusakamana ne. Akyo kyaubiwa. kine." Pano, awa muntu waishile, ne kubatizhiwa, oo, iyai mutambule lubatizhilo lwa Mupashi Wazhila ne bintu byonse, ke kalume wawama wa Kilishitu.

¹⁷⁵ Pano Amiwa nsakwipuzha muntu yense, kupana munema, talai kukwe ne kulomba.

¹⁷⁶ Pano baanga bafunjishi muno bayuka mba Aye ye Ng'anga Mukatampe, ponkapano, ao wakonsha kukwatwa kubya kukabila byetu? Kyawama, inge Aye ujitu pamo keesha, leelo, ne myaka yonse, kabiji ujitu pamo Ng'anga Mukatampe, Aye wakonsha kubila mujishinda jimotu. Yekatu, Aye, mubiji Wanji uji pa. . . pa Jitanda ja Lesa. Baanga bayuka kyokyo? ["Amena."] Mubiji wakwa Yesu uji pa Jitanda ja Lesa. Bino Aye wingijiisha mubiji wetu mukwisolola Ayemwine, nobe byonka byo Alaile kuuba. "Mingilo yonguba Amiwa ne anweba mukeyuba."

Amiwa mbona kwi mwipuzha kwikala nzoo, ikalai na munema, labainga, ne kulomba.

¹⁷⁷ Pano, Taata wa Mwiulu, Amiwa naeseka kwikala wamunema mo Nayukila kubila, pa kikye. Pano kyambo kimotu kyafuma kwi Anweba, Nkambo, kabiji lekai jicheche, Jiwi jicheche jiye mujije jibumba ne kwamba mba, "Yami Iye; kechi mube moyo ne." Kiswishai kye, Taata. Kabiji Amiwa nepana amiwa mwine kwi Anweba, na Mbila yasapwilwa bufuku buno, na Kyambo Kyenu kyashinikishiwa. Anweba kechi mwakonsha kwikyuba ne. Bino inge Anweba mukeyyuba, nangwa Anweba mwikyuba, ke mambo a kuuba mba Anweba

mwikilaile. Nalomba mba Anweba musakuswisha kikye, mu Jizhina ja Yesu. Amena.

178 Kabiji yense ekale na munema, ikalaitu na munema. Muji byepi? Pano Amiwa nsakwimupa Kinembelo byo tubena kuya kulutwe. Inge Nkambo wikyuba, Amiwa kechi nayuka ne. Bino ku-...Kabiji Nabasapwilenga muyewa musango, mwamona, awa ke musango umo wa kushingwa kwa manyi. Awe ke musango mukwabo wa kushingwa manyi. Akya kyajinga ke mapesho. Akye, ke kintutu kimo, kifumyamotu bumi mwi obewa.

179 Pano inetu waimana papo. Amiwa kechi na kimumonapo mu bumi bwami ne. Atweba twi benyi? Naketekela obewa waji kwaamba mba, kimye kicheche kyapita, Amiwa kechi nakuyuka ne. Lesa wakuyuka obewa. Aye wanyuka. Wayuka mba byo twaimana pano pa kino kimye, tukakumbula pa kikye pa Juba Jakije? [Nyenga waamba mba, "Amena."—Waku.] Obewa wayuka kyokyo nyi? Obewa wayuka mba byo twakonsha pakino kimye, Lesa uketulengela ku kumbula kokwa? Amiwa najikwamba kyokyo na mambo akintu kimo. Pano, inge aye Nkambo Yesu usakusolwela byo ubena kuuba, kika kiji mu milanguluko yobe, nangwa kintu kimo kyaye musango, wakonsha kwikiketekela nyi? Mwakonsha kuketekela kyokyo, kechi ibyo nenyi? ["Amena."]

180 Mwakonsha kwikitabila momo, mu jibumba?

181 Pano twaimanatu nobe mwanamukazhi ku mushima, ne Nkambo yetu, mwanamulume ne mwanamukazhi bakumana kimye kitannshi. Mwamona? Pano potuji, twasambakana... Ao ke Yoano Wazhila kyapitala kyabu 4. Pano inge Mupashi Wazhila wakonsha kwamba mba...Inge uji kuno mambo a muntu ungi, inge wakolwa, nangwa lukatazho lwa bwikalo, inge paji makatazho a bya bumali, musango yense mo kyaikela, Amiwa kechi njipo na buyuke ne. Pakuuba Aye wikyuba. Bino Aye wakonsha kuyuka milanguluko iji mu muchima obe. Aye ye Kyambo. Amiwa kechi nakonsha ne. Amiwa ne muntu. Obewa ujitu na lubazhibazhi, kabiji ao oene mambo o Mbeni kubila kikye, mwamona.

182 Alo lo lukatazho lumo lo uji nalo, ke lubazhibazhi. Abyo ibyo. Kabiji obewa uji na kikola kya shunga, akyo kyo kintu kikwabo kiji na lukatazho kwi obewa. Abyo ibyo. Byazhobakana, bintu byavula byatama. Abyo ibyo nyi? Inge abyo ibyo, sutulaiko kuboko kobe. Mwamona? Mwaketekela mba Aye usa kwi mubuka nyi? [Nyenga waamba mba, "Naswa."—Waku.] Waswa nyi? Pano, lubazhibazhi lobe lubena kufuma ku mambo abukulumpe, monai, pano byonse bye bisakupwa. Kabiji Naketekela mba konka ku lwitabilo tusakuya ku Kalvali, na kupipulwa kwa Mashi.

183 Bino, abyo kine ibyo byo Aubile. Aye wa mubuujiile mwanamukazhi ku mushima lukatazho lwanji byo luji. Lwanji ke kuvula kwa banabalume. Lobe lwajinga luka . . . Naketekela mba lubazhibazhi, kabiji bibiji nangwa bikwabo bisatu byatama kwi obewa. Abyo ibyo, kechi ibyo nenyi? Akyo kyo kintutu kimo.

184 Pano, byo Aishile kwi Shimona, Aye wa mubuujiile yeng'anyi. Waketekela mba Lesa wakonsha kumbula jizhina jobe? Bushe kyakonsha kukulengela kwikala na luketekelo lwabaya? Kyakonsha nyi? Mrs. Strong . . . [Nyenga waamba mba, "Stout."—Waku.] Stout, wakonsha kuketekela nyi? Yanga witabile, kabiji obewa . . . Kyapwa. Amena.

185 Iyai. Obewa waketekela nyi? Amiwa ne mwenyi kwi obewa. Amiwa kechi nakuyuka ne. Lesa wakuyuka. Bushe waketekela mba Aye wakonsha kumbula lukatazho lobe nyi? Kabiji inge Aye wauba, nanchi aye Nkambo Lesa apeshiwe. Bushe kyakine nyi? [Nyenga waamba mba, "Ee, kya kine."—Waku.] Pano kechi—kechi wakonsha kusakamana ne, mwamona, awo—awo ye Iye, byo ubena kumvwa byobyoy. Kijitu bulongo. Ne obewa ubena kumanama kumusango wa lubazhibazhi, lukatazho lwa mishipeshipe, kabiji kileta kupwa bulume. Kabiji ubena kukatazhiwa na lukatazho lwa kisukwilo, paji kyatama ku jichima, kabiji obewa wakepelwa mashi. Abyo ibyo. Uji na kintu kimo . . .

186 Kyatwajijila na kumweshwa mwanamulume kuno. Bushe waketekela mba Lesa wakonsha kwi mubuka nyi? [Aye nyenga waamba mba, "Ee, Naswa."—Waku.] Mulume obe abukwe, ne aye, amukonseshe? Obewa waketekela mba lukatazho lobe lwa munda lusakupwa, ne kwikala bulongo nyi? Abyo byo abena kumanamako. Yanga ukabike maboko obe pe aye, mubuule byobyoy, kabiji bisa—bisa kupwa.

187 Amiwa ne mwenyi kwi obewa. Aye Nkambo Yesu wituyuka bonse babiji, kechi Aye wayuka nenyi? Bushe mwaketekela mba Lesa wakonsha kwi mubuka nyi? Inge aye Nkambo Yesu wansolwela bintu bya . . . amba obewa uji . . . akyo kiji mu muchima wenu, waketekela mba Aye usa kwimukosesha nyi? Obewa wajinga na lukatazho. Obewa uji na—na—na lukatazho lwa kisukwilo, kintu kimo. Kabiji kintu kikwabo, kyaleta kisukwilo kyobe kwikala na bilonda, abyo dokotala obe byo aambile. Pano, kintu kikwabo ke kino, amba babena kukeba kukutumbula pa kikye. Abyo kine ibyo. Bushe kyakine nyi? Bino waketekela mba Aye wakonsha kupita pa byobyoy? Obewa waketekela mba lwitabilo lobe luji mwi Aye? Pano anweba mwayuka mba abyo kechi ke amiwa mbena kwibyuba ne. Waketekela nyi? Kijitu bulongo. Yanga, kabiji nobe byonka byo waketekela, nanchi kikubilwe obewa.

188 Twibenyi ku umo ne mukwabo, Naketekela. Aye Nkambo Lesa wayuka atweba bonse babiji. Mwaketekela mba Aye

wakonsha nkusolwela bintu byakonsha kukukwasha nyi? [Nyenga waamba mba, “Ee, Nekiyuka.”—Waku.] Obewa, waketekela mba Aye usakuuba. [“Kyaitabilwa.”] Amiwa mbena kwamba. . . “Kyaitabilwa,” akyo kyawama bingi. Akyo kyawama bingi. Pano obewa uji na bintu byatama byavula, byavula bingi byalubakana ne bikwabo, kabiji ne kukopola, obewa kechi wakonsha kwi kishinda ne. Uji bingi na moyo. Kabiji—kabiji abyo, abyo ibyo.

¹⁸⁹ Pano, obewa uji na kisendwa mu muchima obe, kabiji ne kyokyo kisendwa ke kya muntu umo, ao mwanobe wamulume. Kabiji uji na—na lukatazho, lukatazho lwa kunzubo. Aye ne mukazhi wanj, kimye kyonse babena kwiendeleka kabiji ne kutwajijilatu. . . ? . . . Kabiji uji na kinemenezhi pa kyokyo. Abyo ibyo. Pano mwaketekela na muchima wenu yense, kabiji kisakwikalatu bulongo ne kupwa. Anweba mwaketekela pano. Aye Nkambo emupeshe.

¹⁹⁰ Muji byepi, mwane? Amiwa ne mwenyi kwi obewa, kabiji—kabiji obewa wi mwenyi kwi amiwa. Kabiji kya—kyatatula. . . Bimwesho pano, byo Namona, kyamweka nobe nzubo yonse yayulwamo kyeya, kiji nobe-kazhimbiji kabena kuzhokoloka. Mwamona? Bino waketekela mba Nkambo Yesu wakonsha ku nsolwela kyo waimena kuno? Mwaketekela mba Aye wakonsha nyi? Naketekela kyokyo, ne ami. Amiwa mbena kwambatu kwi obewa pakwamba mba kwatakane na mupashi obe, kine kyo Mbena kwikyubila. Monai, Amiwa kechi nakuyuka ne, nanchi kyafwainwa kwikalala kintu kimo kiji ku lubaji lwami pakuuba mba kyubiwe. Amiwa nafwainwa kwifumyako amiwamwine, pakuuba mba Aye ekyube Ayemwine. Mwikyumvwa nyi?

¹⁹¹ Pano, kintu kimo, obewa ubena kukolwa na lukatazho lwa mishipeshipe, kabiji alwe lukatazho lwabandako. Abyo ibyo. Kabiji alwe lukatazho lwa mishipeshipe lwalengela ne kwenda mashi lubilo, ne alo. Kabiji wajinga na kalepu. Abyo byokiji. Kwaamba mba, obewa wajinga musapwishi, nangwa obewa wi musapwishi. Pano obewa wi musapwishi; Najikukumona waimana mu pulupiti. Pano, ikalai na lwitabilo mwi Lesa, kabiji alo lubazhibazhi lusakupwa. Basapwishi bonse baji na kyokyo. Obewa usa kwikalatu bulongo. Bwela ku pulupiti obe, kabiji ne kukokela Lesa ne kwikalala wakishika ku kyokya Kyambo, Yesu Kilishitu.

¹⁹² Mwaketekela mba lukatazho lobe lwa musana lwapwa, kwikalala mu kipona nyi? Bushe wikiketekela nyi? [Aye nyenga waamba mba, “Ee.”—Waku.] Kijitu bulongo, mwane, nanchi twajijilaitu kuya, kasa mwamba mba, “Nemusachila Anweba, Nkambo.”

¹⁹³ Iyai, inetu. Muji byepi? Obewa waketekela ami kwikalala kalume Wanji nyi? [Aye nyenga waamba mba, “Kine naswa.”—Waku.] Kijitu bulongo. Bushe mwaketekela mba lukatazho lu

bainetu nyi, lukatazho lwa banabakazhi, lusakwimuleka nyi? [“Amena.”] Mwikiketekela nyi? Pano yanga kulutwe, na kwamba mba, “Nemusachila Anweba, Nkambo.”

¹⁹⁴ Lukatazho lwa jifyo, lukatazho lwa musana, musana obe. Bushe mwaketekela mba Lesa usa kwi mubuka kabiji usa kwimukosesha, kufuma ku kyokyo nyi? Obewa waketekela mba Aye usakukukosesha? Kijitu bulongo, senda byobe . . . ? . . .

¹⁹⁵ Iyai, inetu. Amiwa ne mwenyi kwi obewa. Inge kechi Naambapo kintu kimo kwi obewa, nangwa pachechetu ne, mwakonsha kuketekela mba Kyeenyi kya Lesa kiji muno na kubuka bakolwa? [Nyenga waamba mba, “Kyakine, Nekiketekela.”—Waku.] Mwakonsha nyi? Kyawama, inge byo kiji, lukatazho lobe lwa munda . . . Amiwa najikwimubuula, mwamona. Kya—kyaya. Amiwa naji kwimubuula, mwamona.

¹⁹⁶ Muji byepi, mwane? Lesa wikala mu muchima. Kabiji muchima obe ubamwekenga pano bukatataka, kyabaya bingi. Bushe mwaketekela mba Aye usakwimulengela kwikalatu bulongo nyi? Yanga mujishinda jobe na kwiketekela. Lesa akupeshe. Anweba mwaketekela; Aye ukekilenga kwikala bulongo.

¹⁹⁷ Obewa uji na lubazhibazhi, mambo uji lukatazho lwa munda, bilonda bya munda. Kileta bingi lukatazho panyuma ya kuja. Obewa waketekela mba kypwa pano nyi? Yanga ukakebe kintu kya kuja.

¹⁹⁸ Kyajinga kyakosa bingi kwi obewa pakuuba mba wimane, musana wakukatazha bingi. [Aye mulwazhi waamba, “Ee, mwane.”—Waku.] Kechi kikakukatazhapo jibiji ne, inge mwakonsha kwiketekela. Mwakonsha nyi? [“Ee, mwane.”] Kijitu bulongo, yanga kulutwe, kabiji lekai aye Nkambo Yesu akulenge kwikala mututulu.

¹⁹⁹ Lubazhibazhi lobe lwa byepi? Pano yangatu, na kwamba mba, “Amiwa kechi sakwikala na lubazhibazhi ne jikwabo ne,” kabiji kechi usakwikala byobyoye ne. Yanga na kuketekela. Kijitu bulongo, mwane.

²⁰⁰ Iya, inetu. Pano, mwanamukazhi mwina Ethiopia, kabiji ne muzungu mwanamulume, kijitu pamo nobe kintu kimo kyo akumenye mu joja juba, Yesu. Bajinga na misalululo nobe byo bajinga ku Kabeta kabulenge, bino kechi tuji nakyoye kutwajijila ne. Yesu balekai bayuke amba bantu bonse bajinga bantu bakwa Lesa. Kechi paji lupusano ne, monai, nangwa wajinga Muyudeya nangwa mwina Samaliya.


²⁰¹ Pano, inge Lesa kechi wakonsha kukukwasha ne, katatakatu akya kikola kya mashimba kisa kukulengela bulema. Bino mwaketekela mba Aye usa kwimukwasha nyi, kwikala bulongo? Nobe byonka byaubile mwanamukazhi, yanga ukabule bantu bobo bintu bikatampe Lesa byo akubila. Kijitu bulongo.

Pano, kuji dokotala utumbula winengezha kutola mupenyi.

²⁰² Pa ka kimyetu kacheche. Kechi kyajinga yuwe mwanamukazhi ne. Pano, pa kimyetu kicheche, bonse ikalai na munema. Ye—ye Satana, waeseka kubapo kintu kimo. Byo kiji. Kitumbwa, kitumbwa, anweba bonse. Abyo ibyo. Obewa uji na kitumbwa, aye uji na kitumbwa, kabiji diabola ubena kubijika na kukeba bukwasho kufuma ku mukwabo. Pakuuba Mupashi Wazhila ubena kubujika, ne aye. Ng’anyi ye musakuketekela, Aye nyi? Kijitu bulongo. Imana kufuma pa yewa mwanya, inetu. Imana kufuma pa mubanda. Imana mfuma pa kyokyo, ne kuketekela. Yanga, muketekele Aye pakino kimye. Amena.

²⁰³ Bushe mwaketekela nyi? Bintu byonse byakonsheka. Bushe mwaketekela nyi? Pano nga anweba mu jibumba?

²⁰⁴ Twayai twimane ponka pano. Ponkapano kyo kimye kya kwikyuba. Lekai muntu yense. . . Lesa emupeshe. Lekai muntu yense emane ponkapano. Panai lutotelo kwi Lesa. Sutulaiko maboko enu.

²⁰⁵ Nemusachila Anweba, Nkambo Yesu! Twimutota Anweba mambo a bukata bwenu, kabiji ne lubuko Lwenu pa bakolwa. 

LUSHIMUNO LWA PAKALUNGA KAMEEMA KDE64-0307
(A Testimony On The Sea)

Ino Mbila na Mulongo William Marrion Branham, yalupwilwe patanshi mu Kizungu pa Kibelushi mabaanga abufuku, 7 Kisaka, 1964, ku Soul's Harbor Temple ku Dallas, Texas, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2022 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org